

B. IV. 23

Flor. 1. p. 10.





CLAUDII DE FERRIERE
U. J. D.
INSTITUTIONES
JURIS
CANONICI
*Novæ & singulari Me-
thodo Contextæ,*
AD USUM STUDIOSORUM
JURIS

PARISIIS A. MDCCXXXII
EDITÆ

P. P. Evermitt. famula. Insula Vignay.



REIMPRESSÆ
VILNÆ
MDCCLXV Typis Ba-
filianis.

REIMPRIMATUR
CAROLUS KARP
Canonicus Cathedr. & Of-
ficialis Vilnen.

mpr.




JLLUSTRISSIMO
EXCELL. & REVEREN. DNO
PAULO XAVERIO
COMITI
BRZOSTOWSKI
SUPREMO NOTARIO M. D. L.
CANONICO CATHEDRA-
LI VILNENSI.

*S. N. Monachus Basilianus
S. P. D.*




*Si vulgi iudicio standum foret,
tantum abest, Illūe Domi-
ne, ut Tibi libellum mole per-
exiguum nuncupatum irem, ut
adferre etiam ad Te vererer. Ea
etenim plurimorum est modo o-
pinio; Magnis Viris nisi magna*

vo.



*volumina offerri non debere. Sed
quoniam mihi res est tecum CO-
MES EXCELLENTISSI-
ME, qui ingenium non oculos
adhibes, ut pretium statua rei
suum; quique ut loquar cum Po-
eta:*

*Non magna bonum, sed bo-
na magna putas; tanto fidentius
Amplissimum Nomen Tuum
exili huic, quam typis iterum ex-
primendam suscepi, præpono O-
pella, quanto dignior ejus Auctor
visus fuit, quem in rariorum Bi-
bliothecæ Tuæ librorum censum
referres, gravissima sententia
Tua omne in hoc genere litte-
rarum tulisse punctum judicares,
de-*

denique liberalitate Tua publico
litteratorum Patriæ nostræ com-
modo impertires.

Accedit, Te adeo mature ve-
ræ laudi operam dare cœpisse,
ut Nomen Tuum alienis non in-
digeat lucubrationibus sed ex Te
ipso, scilicet ex tuis, quæ publica
luce donasti, litterarum monu-
mentis, satis habeat, quo ad po-
steritatis memoriam propagetur.
Quid enim præstantius opere
illo Tuo, quo Hominem Bal-
thasaris Gratiani Omnib9 Nu-
meris Absolutum, sive ut is i-
pse inscripsit, Universalem, Hi-
spanis solis olim Gallisque cogni-
tum, cum Polonia, insigni ejus
fru-



fructu, communicasti? Quid immortalitate dignius Theologia Morali, solida illa atque copiosa, quam cultissimo Patrio sermone vestitam publicis usibus addixisti? Quid gravius illo exili quidem, si molem spectes, sed rebus maximo opusculo, quod De Officiis Honesti Homini nuper nostris Typis vulgasti? Quid dicam de celeberrima Ode, ab eximio Scholis Piis juxta atq; Doctis Poeta, Georgio Ciapinski, sub tempus auspiciatissimæ Regiæ Coronationis decantata, quam ita terse nitide ac concinne ad Lyricos Patriæ modos numerosq; accommodasti, ut recte de te idem Excel



cellens Vates scriptum reliquerit.
OEnotriis quod Flaccus erat,
quod Pindarus Argis, Hoc est
BRZOSTOVIUS nunc Tibi
Sarmatiæ. Quid etiam proferam
de Historia Regni Poloniæ Clar.
V. Solignac, quæ operâ Doctis-
simorum Virorum, ope vero ac
insigni liberalitate Tua in lucem
prodit modo? Sane si perges que-
madmodum cœpisti, uti procerto
perges, non deerunt demum maxi-
ma cum aliorum, tum tuipsiq; vo-
lumina, quæ mensuram Nominis
Tui, & de Te conceptam spem
omnium exæquabunt. In soli-
us proinde observantiæ in Te, at-
que publici cultus significationem
li-



liceat mihi vel tanto Tibi litare
opusculo, si is quidem sum, qui im-
prudens vulgo potius videri malo,
quam inofficiosus in te Litterarum
Litteratorumque Decus & Præ-
sidium, a prudentibus prædicari.
• Vale Seculi Nostri Delicium.
Dabam Vilnæ X. Cal. Jan.
MDCCLXV.



DE



DE VARIIS
CANONICI JURIS
COLLECTIONIBUS.

CORPUS Juris Canonici sex Col-
lectionibus constat.

Prima collectio Decretum Grati-
ani vocatur, a nomine Autoris, qui
Monachus Benedictini Ordinis fuit,
patria Clusinus, Professus in Bono-
nienti sancti Fœlicis Monasterio.

Ordinatum fuit Decretum Gra-
tiani præsertim ex variis Concilio-
rum Canonibus, Decretis Summo-
rum Pontificum, Sanctorumque Pa-
trum sententiis.

Prodiit anno Christi 1151. sedente
Romæ Eugenio III. Et quoniam
hoc opus privati tantum Doctōris

Au- Au-

authoritatem habet, quæ in eo continentur vim & robur suum, non a Gratiani collectione, sed à propriis fontibus mutuantur.

Inscripsit Gratianus hoc opus, concordantiam discordantium Canonum; quia Canones inter se pugnantes ad concordiam revocant.

Hujus voluminis tres sunt partes. Prima continet centum distinctiones & unam; in illâ parte agitur de Jure ipso, & de ejus partibus: de personis Ecclesiasticis, & de earum ordinationibus.

Secunda pars continet triginta sex causas, seu species, quarum quælibet in aliquot quæstiones dividitur. Illa pars ordinem judiciorum explicat, exceptis decem postremis causis, in quibus agitur de Sacramento Matrimonii, & de ejus impedimentis, inter quæ erat olim poenitentia publica: quapropter Tractatus de poenitentia continetur in causa 33, qui Tractatus cum esset longior, ideo in septem distinctiones ab Interpretibus divisus est. Ter-

JURIS CANONICI. 3

Tertia pars est de consecratione; continet quinque distinctiones, & præcipuè tractat de consecrandis Ecclesiis, vasisque Ecclesiæ & de Sacramentis Baptismi, & Eucharistiæ.

Secunda Canonici Juris collectio continet quinque libros Decretalium Gregorii IX. qui novam Pontificalium Epistolarum collectionem ordinavit, operâ Raymundi de Penaforti, & publica autoritate donavit Anno 1230.

Materia horumce librorum hoc versu continetur.

Judex, Judicium, Clerus, Sponsalia, Crimen.

Tertia Canonici Juris collectio Sextus Decretalium nuncupatur, quæ quamvis Gregorianæ instar, in quinque libros dividatur, eademque sit methodo confecta, dicitur tamen sextus Decretalium liber, quia quinque Gregorianis adjunctus est veluti appendix & supplementum.

Autorem habet Bonifacium VIII prodiit circa Annum Christi 1298.

DE VAR. VOLUM.

Continet tam Gregorii IX. Constitutiones nonnullas posteriores, quam sequentium Pontificum, ipsiusque Bonifacii VIII.

Quarta collectio Clementinarum nomine circumfertur; quas Clemens V. partim ex Canonibus Concilii Viennensis, partim propriis Constitutionibus curavit confici, sed morte præventus non publicavit.

Eas fecit Juris publici Joannes XXII. ejus Successor Anno Christi 1317.

Hæc collectio in quinque libros eodem Ordine quo Decretales, & sextus, dividitur.

Quinta Collectio complectitur viginti Constitutiones Joannis XXII titulis quatuordecim comprehensas nulla librorum propter materię paucitatē, facta divisione, & dicuntur extravagantes Joannis XXII

Quo tempore prodierit incertum est; ejus autor obiisse dicitur Anno 1334.

Sexta Collectio extravagantium communium nomen præferret.

JURIS CANONICI 5

Continet Constitutiones diversorum S. Pontificum, qui vel ante Joannem XXII. vel post eum vixerunt.

In quinque Libros dividitur: verum quoniam de Matrimonio nulla Constitutio extat, ideo quartus liber vacare dicitur.

Constitutiones, quæ in his duabus posterioribus Juris Canonici collectionibus continentur, extravagantes ideo vocantur, quod non publica autoritate, sed privatorum duntaxat cura, Juris Canonici libris insertæ sint.

Cæterum Decretales vim Juris habent apud nos, quatenus Libertatibus Ecclesiæ Gallicanæ & moribus nostris non adversantur.

Hæ collectiones non uno, eodemque modo laudantur.

Canones primæ partis Decreti laudantur, prima cujusque Canonis vocabula citando adjecto numero Canonis, & distinctionis v.g. *Canone multis 5 distinctione 2.*

6 DE VAR. VOLUM.

Canones secundæ partis Decreti citantur, prima cuiusque vocabula referendo, numerumque causæ, & quæstionis v. g. *Canone sancta 2. q. 7.* Hic enim subiacetur vox *causa*. Nota tamen quod Canones Tractatus de Pœnitentia citentur eodem modo, ac Canones primæ partis, hoc tamen adjecto *de Pœnitentia* v. g. *Can. Petrus 1. dist. 1. de Pœnit.*

Canones tertiæ partis laudantur eodem modo, ac primæ partis Canones, hoc tamen adjecto *de Consecratione* v. g. *Canone non potest 4. dist. 4. de Consecratione.*

Decretalium capitula laudantur per primas capituli voces, vel per numerum, cum rubrica seu titulo, & adjecta voce *extra*, quæ denotat ea quæ citantur esse extra Decretum Gratiani, & esse in Decretalibus v. g. *Capitulo Si quis 1. extra de foro competenti.*

Capitula Sexti eodem modo citentur, nisi quod loco vocis *extra* hæc referatur in fine, scilicet *in sexto*


JURIS CANONICI. 7

to v. g. *capitulo quanquam* i. de *judiciis*, in *sexto*.

Eodem etiam modo citantur capitula Clementinarum, ac capitula Decretalium, loco vocis *extra* hoc posito in *Clementinis* v. g. *capit. venit* 2. in *Clementinis de Baptismo*.

Eodem modo laudantur Extravagantes Joannis XXII nisi quod in fine adjiciantur hæ voces *apud Joannem XXII. vel in Extravagantibus Joannis XXII.* v. g. *Cap. unico de crimine falsi. apud Joannem XXII vel in Extravagantibus Joannis XII.*

Extravagantium Communium capitula eodem modo citantur, ac capitula Extravagantium Joannis XXII nisi quod posteriores voces ita mutantur, nempe in *extravagantibus communibus*.



DE JURE CANON. & EJUS DIVISIONE

Jus Canonicum est collectio re-

gularum, quas Ecclesia sibi constituit, vel ad fidei declarationem, vel ad muniendam disciplinam.

Canonicum dicitur a Græco Canon quod latine regulam significat.

Dividitur vel ratione materiæ, vel ratione formæ.

Ratione materiæ **I**us Canonicum, vel ad fidem pertinet, vel ad mores & Ecclesiasticam disciplinam.

Quæ ad fidem spectant, vocantur dogmata, quæ verò pertinent ad disciplinam, Canonum appellatione designantur.

Quæ ad fidem pertinent, ab omnibus Ecclesiis debent servari, regula enim fidei una est; sed quæ disciplinam respiciunt, pro varia locorum personarum, & temporum circumstantia possunt immutari.

Ratione formæ; Jus Canonicum dividitur in scriptum, & non scriptum.

De Jure Scripto.

Juris scripti duæ sunt. species, scilicet, sacrae Scripturae & Canones. Sa-

Sacrae Scripturae continentur libris veteris & novi Testamenti, quorum librorum numerum, & Auctoritatem definiunt Patres Concilii Tridentini.

Canones vero, aut ex Conciliis, aut ex Constitutionibus summorum Pontificum, aut ex Sententiis Sanctorum Patrum collecti sunt.

De Conciliis.

Quod Graece Synodus, hoc latine Concilium est.

Sunt autem Concilia, Ecclesiastica comitia in quibus de rebus fidei & de disciplina tractatur; Concilium enim fidem non definit, sed eam ex Sacra Scriptura declarat, statuit vero circa mores & disciplinam.

Concilia quadruplicis generis distinguuntur, scilicet generalia, seu oecumenica, nationalia, provincialia, & Episcopalia, seu Lioccesana.

Oecumenica. seu generalia sunt ea, quae ex universis Christiani orbis Provinciis convocantur.

Congregari non debent inconsulto summo Pontifice, imo ab ipso convocari debent.

Nationalia sunt ea, quæ ex pluribus Provinciis, & Metropolis per Primates convocantur.

Provincialia sunt ea, quæ collectis ex una Provincia Episcopis a Metropolitano congregantur.

Episcopalia sunt quæ a singulis Episcopis in sua Diœcesi habentur ex Presbyteris Parochialibus.

Illa autem propriè Concilia non sunt, siquidem ad ea plures non conveniunt Episcopi, unde Synodi nomen retinuerunt.

Inter œcumenica & alia Concilia hoc discrimen est, quod particularia subditos duntaxat ligent, nisi vel a summo Pontifice approbata sint, vel in corpus juris relata; œcumenica vero fideles omnes adstringant; quod quidem certissimum est, quantum ad dogmata; at quantum ad disciplinam, ita demum si a Regnis & Nationibus admissa sint.

De

De Constitutionibus summorum Pontificum.

Constitutiones summorum Pontificum, vel generales sunt, vel personales.

Generales sunt quæ omnes tenent.

Personales sunt quæ diriguntur ad certas Personas, & eas tenent quæ in iis continentur, ut simplicia summorum Pontificum Decreta, rescripta quæ in publicas collectiones relata non sunt; adnotationes. & mandata.

De Sententiis Sanctorum Patrum.

Sententiæ Sanctorum Patrum sunt Sanctorum Virorum dicta.

In corpus Juris si relata sint; & a summis Pontificibus approbata parem cum cæteris Constitutionibus Pontificiis auctoritatem habere non ambigitur.

De

De Jure non Scripto.

Hujus duæ sunt species. consuetudo nimirum & traditio.

Consuetudo est Jus usu inveteratum, quod lege, vel ratione legis deficiente, pro lege observatur.

Ad eam pertinet, 1. Ut sit legitime præscripta, puta Jure Canonico spatio 40 Annuorum 2. Ut non aliter Jus Constituat, quam si rationi consentanea fit.

Traditiones sunt instituta, quæ ore tenus a Christo Domino, Apostolis, sanctisque Patribus, Spiritu Sancto afflante, quasi per manus transmissa, ad nos usque pervenerunt.

Triplicis generis sunt, divinæ scilicet, quas Apostoli a Christo Domino acceperunt, Apostolicæ quæ ab Apostolis emanant, & Ecclesiasticæ quæ a Sanctis Patribus, Prælativisve inchoatæ, tacito populi consensu confirmatæ sunt.


Di-

DE JURE NON SCR. 13

Divinæ & Apostolicæ Traditiones ab omnibus admittendæ sunt, Ecclesiasticæ vero ita demum si ab universa Ecclesia receptæ sint. nam si alienigenæ Ecclesiæ peculiæres sint, ibi tantum vim Juris obtinent.

Cæterum consuetudo in hoc potissimum cum Traditione convenit, quod utraq; ab initio scripta non sit, in hoc autem consuetudo a Traditione præcipue differt, quod Traditio aliquem autorem habeat, à quo simul ac constituta est, consuetudo vero sensim introducta est, ex tacito tantum populi usu.





LIBER PRIMUS

TITULUS I.

De Jure Personarum.

Tria sunt Juris Canonici obiecta
scilicet personæ, res, & judi-
cia.

Jure Canonico summa Persona-
rum divisio est, in Laicos & Cleri-
cos.

Laici sunt, qui negotiis sæcula-
ribus vacare possunt. nec sunt di-
vinis ministeriis mancipati.

Clerici sunt, qui divinis ministe-
riis per ordinationem ita mancipati
sunt ut negotiis sæcularibus va-
care non debeant.

Clericorum alii sunt sæculares,
alii regulares.

Sæculares sunt qui in sæculo vi-
vunt nec ulli speciali regulæ sunt
addicti. Re-

DE JURE PERSON. 15

Regulares sunt qui sub certa, & ab Ecclesia approbata regula vitam in communi agunt.

Clericorum rursus alii sunt in majoribus ordinibus: alii vero in minoribus.

Denique Clericorum alii jurisdictionem habent & dicuntur Prælati: alii jurisdictionem non habent.

Prælati autem, vel majores sunt, vel minores.

Majores, qui apicem Pontificatus tenent, nimirum summus Pontifex, Patriarchæ, Primates, Archiepiscopi seu Metropolitani, & Episcopi.

Minores, qui Jurisdictionem habent, sed non tenent apicem Pontificatus, ut Archidiaconus, Archipresbyter, & alii.

TITULUS II.

De Summo Pontifice.

Summus Pontifex est Christi Vicarius in terris, Divi Petri successor, Sacerdotum omnium primus, totius Ecclesiæ caput visibi-

le atque unitatis Ecclesiæ fundamentum.

TITULUS III.

De Patriarchis & Primatibus.

Patriarchæ sunt quasi Patrum Principes, qui tractum Provinciarum, pluribusque Metropolitanis præsent, cum ipsi immediate summo Pontifici subiecti sint.

- Hodie quatuor sunt, nimirum Constantinopolitanus, Alexandrinus, Antiochenus, & Hierosolimitanus.

Juris Patriarcharum tria tantum olim erant, nimirum ut Metropolitanos suæ jurisdictioni subiectos Ordinarent, convocarent Synodos Patriarchales, & ut de majoribus causis cognoscerent.

Nunc vero tria alia recensentur. scilicet potestas Pallii suis Metropolitanis tribuendi, postquam illud a summo Pontifice acceperint, jus Crucis ante se deferendæ, nisi in urbe Roma, vel ubi summus Pontifex, aut ejus Legatus legationis
in-

DE PATRIARCHIS. 17.

in signis utens extiterit; & jus appellationis ex omnibus Provinciis sibi subditis, salvo jure appellationis ad summum Pontificem.

Primates Latinis dicuntur, qui Græcis Exarchi, qui scilicet tractui Provinciarum pluribusque Metropolitans præfunt, cum ipsi proprio Patriarchæ sint subiecti.

Jus Primatus hodie ex Privilegiis Sedis Apostolicæ descendit, & in solo fere jure appellationis & correctionis consistere videtur.

TITULUS IV.

De Archiepiscopis & Episcopis.

Archiepiscopi seu Metropolitani, sunt Prælati, qui alicujus Provinciæ Episcopis præfunt.

Illorum potestas in hoc potissimum consistit, ut nihil magni momenti eis inconsultis in Provincia geri possit, & specialiter in ordinatione Episcoporum seu Provinciæ ac in Provincialium Conciliorum convocatione.

E-

Episcopi sunt Prælati, qui singulis Diœcesibus præsunt; sic dicti quia in specula positi sunt, ut in vitam & mores subditorum inspiciant.

Jure divino instituti fuerunt Episcopi ut Ecclesiam Dei regerent, & a simplicibus Sacerdotibus ordine quidem Sacerdotii non differunt; sed ratione ordinis Episcopalis, cujus multa præcipua sunt, quæ non competunt simplici Presbytero; & ratione jurisdictionis, quam Episcopus habet in subditos.

Potestas Episcoporum duplex est, alia Ordinis, ut est Clericorum ordinatio: alia jurisdictionis sive voluntariæ, sive contentiosæ, ut est jus corrigendi, & excommunicandi, cognoscendi de causis Ecclesiasticis & beneficia conferendi.

Rursus jura Episcoporum, vel consistunt in dando, vel in accipiendo: illa specialiter dicuntur pertinere ad legem jurisdictionis, hæc vero ad legem Diœcesanam.

Cæterum Episcopi in populosis
tan-

DE POSTULATIONE. 19
tantum civitatibus constitui debent.

TITULUS V.

De Postulatione.

Prælati promoventur, postulatione, & electione; apud nos vero nominatione Regia: Nam ex Concordatis, *Titulo de Regia ad Prælaturas nominatione*, vacante Cathedrali vel Metropolitana Ecclesia, Rex Christianissimus summo Pontifici idoneum aliquem nominat, intra sex menses à die vacationis computandos, ut per sedem Apostolicam vacanti præficiatur Ecclesiæ. Similiter vacantibus Monasteriis, & Prioratibus conventualibus & electivis, Religiosum ejusdem Ordinis Virum intra idem temporis spatium nominare debet, cui a summo Pontifice de loco vacante provideatur.

Est autem postulatio, concors capituli petitio, ut is qui propter aliquem defectum, non animi tamen, aut corporis eligi non potest, ex
di-

20 DE POSTULATIONE.

dispensatione, causa cognita, promoveatur & assumatur

Extraordinarii Juris est postulatio, sit enim enim eorum, quorum electioni aliquod obstat canonicum impedimentum, non tamen corporis aut animi vitium, sed alius defectus, puta natalium, ætatis, ordinisve.

- Quin etiam alicui Ecclesiæ alligatus sine dispensatione ad aliam transire non potest, propter spiritualis Matrimonii vinculum, quod Episcopum inter & Ecclesiam intercedit.

Postulatio nullum tribuit jus postulato; unde non ipsi, sed Superiori decretum postulationis offertur, & possunt postulantes a postulatione recedere, saltem antequam superiori postulationis decretum oblatum fuerit; nam postea ipsis variare non licet, ne superiori videantur illudere.

Admissio postulationis, gratiæ magis est, quam justitiæ; quia scilicet

DE POSTULATIONE. 21

licet dispensationem super aliquo defectu continet; quamvis respectu Ecclesiæ superior ex officio necessitate eam admittere teneatur; si necessitas Ecclesiæ postulet.

Postulatio debet esse concors. vel concordia plena, ita ut omnes in unum consentiant: vel concordia imperfecta, puta cum major & senior pars capituli in unum consentit. Ut rite peragatur postulatio requiruntur. 1. Solemnitas decreti, quod redigatur in scripturam, & postulantium subscriptione muniat.

2. Ut postulationis Decretum neque diem, neque conditionem adjectam habeat.

3. Ut vocentur ii omnes qui eligendi jus habent, quia postulatio ipsa genus est electionis, sed extra ordinem.

TITULUS VI.

De Electione.

Electio est personæ idoneæ, ad præ-

prælaturam, vel fraternam societatem, canonice facta vocatio.

Dicitur *personæ idoneæ*; minimus enim defectus electionem impedit. Itaque eligi non possunt qui defectum patiuntur natalium, corporis ætatis, vel Ordinis, vel animi, aut alicujus necessariæ qualitatis.

Dicitur *ad Prælaturas, vel fraternam societatem*; quia non tantum electio in prælaturis locum habet, sed etiam in aliis Beneficiis, sacrisque Sodalitiis seu Fraternalibus societatibus.

Conveniunt electio & postulatio
1. Quod neutra diem vel conditionem recipiat, vel vota alternativa.

2. Quod in utraque servari debeat forma capituli, *quia propter* 42. *extra de Electione*, & quod ad utramque vocandi sint omnes, ad quos jus eligendi pertinet.

3. Quod utriusque decretum debeat in scripturam redigi, & muni-ri omnium subscriptionibus.

Ve-

Verum postulatio & electio differunt,

1. Quod postulatio sit personæ minus idoneæ, electio verò personæ omnino idoneæ.

2. Quia postulatio nullum jus tribuat postulato; electio vero statim jus tribuit electo, petendæ scilicet, confirmationis; quamobrem eligentes, publicato semel scrutinio, variare non possunt.

3. Quia postulationis admissio, magis est gratiæ, quam justitiæ; contra verò electionis confirmatio, justitiæ; unde non potest, nisi ex causa denegari.

Ut canonice fiat electio requiritur.

1. Ut debito tempore celebretur, hoc est, post mortem & sepulturam Prælati, intra tres menses, ne ex defectu Pastoris gregem dominicum lupus rapax invadat: aut in facultatibus suis Ecclesia viduata grave dispendium patiatnr.

2. Ut fiat legitimo modo, & serva-

vata forma, capituli quia propter 42.
extra de electione.

Forma electionis in dicto capitulo triplex est constituta, scilicet per scrutinium, per compromissum & per inspirationem.

Per scrutinium fit, cum praesentibus omnibus qui debent, volunt, & possunt interesse, duo, vel tres de capitulo scrutatores assumuntur, qui sigillatim & secreto singulorum vota Suffragia exquirant, & in scripturam redacta mox publicent, ut facta votorum collatione, is statim eligatur, in quem major & sanior pars capituli consenserit.

Itaque major pars non sufficit, nisi sit etiam sanior. habita scilicet ratione zeli ad zelum, meriti ad meritum; nec etiam sanior pars sufficit, nisi sit quoque major habita ratione ad totum capitulum.

Per compromissum fit, cum uni, aut pluribus, siue sint de gremio Ecclesiae, siue non, potestas eligendi, a toto capitulo committitur. Quod

DE ELECTIONE.

25

si unus dissentiat & velit eligere per scrutinium, non est locus compromisso; quia nemo invitus & sine causa jure suo privari debet.

In electione per compromissum illud specialiter obtinet, ut possit unus e compromissariis sibi suffragari, consentiendo electioni de se factae a parte æquali; tunc enim eligentium numerum utiliter auget, nec videtur ambitiosus, aut vocari a se, cum prius sit vocatus a Deo, atque a sociis, neque se tam suo quam capituli nomine eligat.

Per inspirationem, electio fit, cum nullo præcedente tractatu, quasi divini spiritus impulsu omnes de repente in unum consentiunt.

3. Denique ad electionem requiritur ut fiat convocatis iis omnibus, qui jus habent eligendi; Prælati autem electio de jure ad capitulum pertinet.

Non tamen omnes canonici possunt electioni interesse, sed ii tantum qui vocem habent in capitulo.

B

Hinc

Hinc non sunt ad electionem vocandi impuberes, nec ii qui non sunt in sacris, nec excommunicati excommunicatione majori; sed qui minori tantum excommunicatione excommunicati sunt, possunt eligere, licet eligi non possint.

TITULUS VII.

De Electi Confirmatione & Consecratione.

Ubi Electio celebrata est, quamprimum fieri licet, electo debet praesentari, ejusque consensus exquiri, quem ille intra mensem praebere tenetur.

A die praestiti consensus tres habet menses ad petendam confirmationem; sed ante confirmationem; administrationi se immiscere non potest.

Est autem confirmatio, electi & electionis approbatio a superiore facta. Fieri debet causa cognita, & praevia inquisitione tam in personam electi, quam in processum electionis,

Ele-

Electus verò & confirmatus, intra aliud trimestre spatium consecrari debet.

Consecratio est electi & confirmati solemni ritu facta inunctio. Fieri debet a duobus Episcopis præter Metropolitanum, vel alium ejus loco Episcopum; qui benedictionem fundit, unde dicitur consecrator; duo alii assistentes supra caput ordinandi, codicem Evangelii tenentes, manus imponunt.

Confirmatio tribuit ea duntaxat quæ sunt jurisdictionis, ut Præbendas concedere, res Ecclesiæ administrare &c. Consecratio ea tribuit quæ sunt ordinis ut, Clericorum ordinationes, jus velandi sacrimoniales, benedicendi Abbates Ecclesiarum & Altarium dedicationes, nec non confectionem Chrismatis.

Porro per electionem initiatur conjugium spirituale, quod est inter Episcopum & Ecclesiam; perscitur per confirmationem, & per consecrationem consummatur.

TITULUS VIII.

De authoritate & usu Pallii.

Præter consecrationem Archiepiscopis opus est Pallio, eo enim tradito, simul & officii plenitudo, cum Archiepiscopalis nominis appellatione confertur.

Est autem Pallium, fascia candida, ex lana potissimum, confecta, Crucibus variis distincta, Archiepiscopi humeros stringens, in modum circuli.

Olim à solo summo Pontifice concedebatur, de corpore, id est de Altari sancti Petri, verum etiam à Patriarchis hodie conceditur.

Metropolitanorum insigne ornamentum est, quod officii pastoralis plenitudinem designat; adeo ut ante Pallium acceptum, nec consecrare Suffraganeos, nec Concilia Provincialia convocare, nec alia quæcumque sunt Ordinis Episcopalis, exercere possint.

Ita personæ ejus, cui conceditur

co-

cohæret. ut non possit illud alteri commodare, immo cum mortuo Archiepiscopo sepelitur.

Eo uti debet Metropolitanus, secundum formam. quæ in Pallii traditione continetur, & plerumque intra Cathedralē Ecclesiam, & certis duntaxat diebus.

TITULUS IX.

De Translatione Episcopi.

Majores Ecclesiæ Prælaturæ amittuntur Translatione, & renuntiatione.

Translatio, est Episcopi, ab una sede, ad aliam transitus, & migratio. Non tantum Episcopi consecrati fieri potest, sed etiam ejus qui electus & confirmatus est, quamvis nondum sit consecratus, quoniam per confirmationem Matrimonium spirituale contrahitur inter electum, & Ecclesiam.

Hoc vero spirituale matrimonium non potest sine autoritate summi Pontificis dissolvi.

Fieri debet translatio iusta ex causa, necessitate scilicet, vel **majori** Ecclesiæ utilitate exigente.

TITULUS X.

De Renuntiatione.

Renuntiatio est dignitatis, beneficii, iurisve alicujus, sponte, & cum causæ cognitione, apud superiorem facta dimissio.

Sponte fieri debet: nemo enim facto hominis compelli potest, ut beneficium dimittat; sed jure quis ad renuntiandam cogi potest, veluti si quis culpa sua factus sit irregularis.

Ad eam requiritur Superioris auctoritas, quia in publicis causis nemo potest sine publica auctoritate, juri suo renuntiare, beneficia autem Ecclesiastica publicam causam continent; Superior est Prælati, in Episcopis & exemptis est S. P.

Sex vero causæ sunt propter quas Episcopus potest cedendi licentiam postulare.

I. Est

DE RENUN.

31

I. Est debilitas corporis quæ inhabilem ad officium reddit.

II. Defectus scientiæ necessariæ.

III. Peccatum quod infamiam ipso jure irrogat.

IV. Irregularitas.

V. Malignitas & odium plebis.

VI. Grave scandalum.

Illæ autem causæ his versibus continentur.

*Debilis, ignarus, male conscius
irregularis,*

*Quem mala plebs odit, dans scandalum,
cedere possit.*

TITULUS XI.

De Officio Vicarii.

Vicarius est qui alterius vices gerit, vel in divinis officiis, vel in jurisdictione.

Vicariorum duo sunt genera; alii enim Episcoporum Vicarii sunt; alii Urbanorum.

Episcoporum Vicarii dividuntur in Generales. & Officiales, illi voluntariam jurisdictionem exercent

vi-

vice Episcopi; hi vero contentiosam.

Vicarii Generalis in spiritualibus officium est, litteras dimissorias, ad Ordines dare, absente Episcopo, item eos qui a patrono sunt præsentati instituere.

Officiales sunt Clerici, qui vice Episcopi contentiosam ejus jurisdictionem exercent. ■

Pastorum quoque seu Plebanorum Vicarii duplicis sunt generis; quidam enim ab illorum nutu omnino pendent, & eorum arbitrio constitui ac removeri possunt; quidam vero dicuntur Vicarii perpetui, qui authoritate Episcopi, a Plebanis cum certæ pensionis assignatione, constituuntur in iis Ecclesiis, quæ Monasteriis, Dignitatibus, aut Collegiis unitæ sunt.

Porro de Vicariis perpetuis hoc notandum est, quod ubi beneficium adepti fuerint, Vicaria sua priventur, quoniam perpetua Vicaria beneficium Ecclesiasticum censetur, qua-

DE OFF. & POT. JUD. 33

quatenus Vicarius perpetuus non potest, nisi ex causa amoveri. Præterea portio ejus quæ vocatur congrua, sine causa minui non potest.

TITULUS XII.

De Officio & potestate Judicis delegati

Judex delegatus hoc titulo intelligitur is, cui ad certam causam jurisdictionis mandata est.

Jure Canonico delegare possunt, non tantum illi Judices qui ordinariam jurisdictionem exercent, sed etiam is, qui a summo pontifice delegatus est, idque propter dignitatem delegantis, & ut laboribus partium, & expensis parcatur.

In causa vero delegata, distinguenda sunt ea, quæ pertinent ad officium delegati, ab iis, quæ pertinent ad ejus potestatem.

Officii sunt, 1. Recipere Rescriptam, quo delegatio continetur, & suæ delegationis fidem facere coram Ordinario.

B 51 . . . 2. Par-

34 DE OFF. & POT. JUD.

2. Partes vocare, facta illis copia Rescripti, & earum iustas & rationabiles exceptiones admittere; denique formam Rescripti diligenter servare.

Ad potestatem delegati pertinet.

1. Censuris Ecclesiasticis, vel alia legitima pœna contumaces coercere.

• 2. Judicatum exequi, vel ordinario ejus executionem mandare.

Coeterum delegati potestas expirat, morte delegantis, vel delegati: revocatione tempestiva: diei lapsu ad quem Index datus est: finito negotio, id est, sententia lata & executioni mandata.

TITULUS XIII.

De Officio Legati.

Legati nomine intelligitur, qui jurisdictionis exercendæ causa a summo Pontifice in Provinciis constituantur.

In hoc præsertim differt Legatus à Judice delegato, quod legato cau-

causarum universitas mandatur, Judex vero delegatus ad unam duntaxat causam, vel ad plures sigillatim datur.

Triplicis generis Legati distinguuntur, scilicet Legati à latere, Legati missi, seu Nuntii Apostolici: & Legati nati.

Legati à latere, sunt qui ex numero Cardinalium cum amplissima potestate, in Provincias mittuntur.

Legati missi, sunt qui ex non numero Cardinalium, sed ex aliorum Ecclesiarum Romæ Prelatorum numero electi, Jurisdictionis exercendæ causa mittuntur, nec tanta, quantæ priores potestate censentur.

Legati nati, sunt Prelati cui Privilegio sedis suæ, legationis sibi vindicant dignitatem, ut Rhemensis Archiepiscopus.

Dicuntur Legati nati, quia non mittuntur; sed vi dignitatis, aut beneficii quod obtinent in sua Provincia, Pontificis partibus funguntur.

Omnium Legatorum jurisdictio perpetua est, nec morte delegantis expirat. Inter ordinarios reputantur, licet alieno beneficio, nimirum summi Pontificis, jurisditionem exercent: unde re ipsa, Ordinarii non sunt, sed quia statuta condere possunt perpetua, aliquid proprium habere videntur & reputantur inter Ordinarios.

TITULUS XIV.

De Officio Judicis Ordinarii.

Ordinarius Judex est. qui jure suo non alieno beneficio perpetuam jurisditionem exercet, ut summus Pontifex, Patriarchæ, Prælati, Archiepiscopi, Episcopi, & alii quicumque, aut jure communi, aut ex consuetudine, vel Privilegio, jurisditionem habent.

Sua cuique Ordinario Judici jurisdictio accurate servari debet, ita ut regulariter Episcoporum subditi, coram Archiepiscopis, & deinceps, iudicio stare non cogantur, præterquam per appellationem. Or-

DE REGULARIBUS 37

Ordinarius liberam criminum co-
ercitionem in subditos habet.

TITULUS XV.

*De Regularibus & Transeuntibus
ad Religionem.*

Clericorum, ut supra diximus, alii sæculares sunt, alii regulares, qui etiam vocantur Religiosi.

Regulares sunt professione, per quam adsumitur status tendens ad perfectionem Christianæ Religionis, per tria vota. castitatis scilicet paupertatis, & obedientiæ.

Definitur autem Professio votum Deo factum, vivendi sub certa regula ab Ecclesia approbata.

Ad hanc requiritur 1. Liber & plenus consensus in profutente.

2. Legitima ætas, olim nimirum simplicis pubertatis, nisi regula eisset strictior, quo casu plena requirebatur: sed Concilio Tridentino, sublata & locorum, & sexus differentia, cautum est, ne quis ante decimum


38 *DE REGULARIBUS.*

num sextum Annum completum,
ad professionem admitteretur.

3. Ut Annus probationis profes-
sionem præcedat.

4. Ut fiat inter manus Abbatis;
alteriusve Superioris, aut alienius a
Superiore potestatem habentis; ta-
citas enim Professiones Concilium
Tridentinum reprobavit.

• Duo sunt enim Professionis ef-
fectus; primus est ut non liceat ad
 sæculum redire; secundus vero ut
ad alium ordinem conversus, teme-
re transire non possit.



LIBER SECUNDUS.

TITULUS I.

De Rerum Divisione.

Summa rerum divisio, jure Canonico, est in spirituales, & temporales.

Spirituales sunt quæ spiritui deserviunt, & animæ causa sunt institutionæ, hæc rursus sunt vel corporales, vel incorporales.

Corporales sunt quæ tangi possunt, & humanis sensibus percipi, ut Sacramenta, res sacræ, sanctæ, & religiosæ.

Incorporales sunt quæ non sensu corporeo, sed solo possunt intellectu percipi, ut beneficia, jus patronatû, decimæ, &c.

Temporales sunt, quæ non tam spiritus, quam corporis gratia comparatæ sunt, nempe ad usum Sacrorum

rum & Sacerdotum, ut prædia Ecclesiastica, quæ quoniam ad usum & sustentationem Ministrorum Dei destinata sunt, non, nisi ex causa, & adhibitis iustis conditionibus, possunt alienari.

TITULUS II.

De Sacramentis.

SACRAMENTUM est. invisibilis gratiæ visibilis signum ad nostram justificationem divinitus institutum.

Septem sunt Sacramenta novæ legis a Christo instituta, Baptismus, Confirmatio, Pœnitentia, Eucharistia, extrema-Unctio, Ordo & Matrimonium.

Horum triplex est divisio. Prima est ut quædam voluntaria sint Ordo nempe & Matrimonium; quædam necessaria, ut cætera; quorum alia necessaria sunt, necessitate præcepti tantum, ut Confirmatio, & Extrema-Unctio, alia vero necessaria sunt necessitate salutis, ut Baptismus omnibus hominibus, Euchar-

ri-

nistia adultis, & Poenitentia peccatoribus.

Secunda est ut alia sint vivorum, id est eorum, qui sunt in gratia, ut Confirmatio, Eucharistia, Extrema-
Unctio, Ordo & Matrimonium: alia mortuorum, id est eorum qui sunt in peccato, ut Baptismus, & Poenitentia.

Tertia est, ut alia characterem imprimant, nec proinde possint iterari. ut Baptismus, Confirmatio & Ordo; alia characterem non imprimant, & ita possint iterari, ut cætera.

TITULUS III.

De Baptismo.

Baptismus definitur Sacramentum novæ legis, quo per exteriorem ablu-
tionem corporis, interior animæ, significatur, & efficitur.

Tria sunt de substantia hujus Sacramenti, nempe materia, forma, & intentio Ministri.

Hujus Sacramenti materia est aqua naturalis, elementaris, & si-

ne mixtura, qualis est aqua maris, fluminis, fontis, aqua pluvia.

Forma his verbis continetur: *Ego te baptizo in nomine Patris, & Filii, & Spiritus Sancti.*

Minister est Episcopus, vel Sacerdos non etiam Diaconus, aliusve Clericus, nisi ubi Sacerdotis copia non est, & urget necessitas; quocasa Laici etiam Baptismum conferre possunt, sed nemo seipsum Baptizare potest.

Subjectum est homo natus vivens quæ sive infans, sive adultus; sive senex.

Præcipuus hujus Sacramenti effectus est, ut deleat peccatum originale, januaque Cœlorum aperiat.

TITULUS IV.

De Confirmatione.

Confirmatio est Sacramentum novæ legis, quo plenitudo Spiritus Sancti confertur, ad fidem constantem coram hominibus proficiendam.

Ma-

DE CONF. 43

Materia hujus Sacramenti est, Chrisma ex oleo, & balsamo, ab Episcopo confectum, per oleum, nitor conscientiae; per balsamum, odor bonae famae, designatur.

Forma continetur his verbis, quae profert Episcopus cum baptisatum sacro Chrismate inungit in fronte: *Signo te signo Crucis, confirmo te oleo salutis; in nomine Patris, & Filii, & Spiritus Sancti.*

Minister est solus Episcopus, subiectum est homo infans iam egressus quia infantes, fidei tuendae, idonei non sunt.

TITULUS V.

De Eucharistia.

Eucharistia est Sacramentum novae legis, in quo sub speciebus, panis & vini, verum Christi Corpus verasque ejus sanguis continentur, & sumitur. Illud ergo Sacramentum non tantum gratiam continet, sed etiam ipsum gratiae autorem.

Hujus Sacramenti materia est panis

44 DE EUCHARISTIA.

nis triticeus azymus, quamvis Græci fermentato utantur in eoque tollerentur. & vinum ex uvis expressum, cui paululum aquæ infunditur. & quamvis Eucharistiæ duplex materia sit, unicum tamen Sacramentum est.

Forma ejusdem Sacramenti continetur, iis verbis, quibus Christus usus est cum illud instituoret, puta: *Hoc est Corpus meum, & hic est Calix Sanguinis mei.*

Minister est solus sacerdos; idque ex ipsa Christi institutione; Christus enim in ultima Cœna Apostolos suos in Sacerdotes ordinavit; eisque deinde dedit potestatem conficiendi corporis sui, his verbis, *Hoc facite in meam commemorationem.*

TITULUS VI.

De Pœnitentia.

Pœnitentia est Sacramentum novæ legis, quo eorum, qui post
Ba-

Baptismus lapsi sunt, peccata remittuntur.

Hujus Sacramenti materia, duplex est, remota scilicet, & proxima.

Materia Poenitentiae remota sunt peccata, sive mortalia, sive venialia; ita tamen, ut mortalia sint materia Poenitentiae necessaria, quia aliter, quam per Poenitentiam, vel per ejus votum non remittuntur; venialia vero, sint tantum materia sufficiens, quia multis aliis modis possunt purgari ut eleemosyna, ejuniis &c. In Confessione tamen Paschali, qui sola venialia admisit, tenetur ea confiteri, non quidem jure divino, sed jure Ecclesiastico, nimirum propter Capitulum: *Omnes utriusque sexus. extra, de poenit. & remis.* Ubi fideles omnes qui ad Annos discretionis pervenerunt tenentur, semel in Anno peccata sua proprio Sacerdoti confiteri.

Materia Poenitentiae proxima, est triplex actus Poenitentis, nempe
cor-

cordis contritio, seu dolor de peccato admisso, cum proposito amplius non peccandi, oris Confessio quæ Sacerdoti fieri debet, & operis satisfactio, qui quidem ultimus actus pars Sacramenti integrans est non autem omnino necessaria, quia ejus defectus quandoque non reddit hoc Sacramentum inefficax, ut si poenitens morte præventus Poenitentiam sibi injunctam absolvere non possit.

Forma ejus Sacramenti continetur, his verbis: *Ego te absolvo a peccatis tuis, in nomine Patris, Filii & Spiritus Sancti.*

Minister est Sacerdos, qui absolvendi potestatem habet.

TITULUS VII.

De Extrema-Untione.

Extréma-Untio, est Sacramentum novæ legis, quo per exteriorē corporis partium unctionem, animæ corporisque robur ac Sanctitas in-

DE EXTR. UNCT. 47

infirmis, & periclitantibus, procuratur.

Materia est oleum ab Episcopo benedictum.

Formam constituunt verba quibus in unguendis corporis partibus, Minister utitur; puta *Per istam sanctam Unctionem, Et suam piissimam misericordiam, indulgeat tibi Domine quicquid per visum, (Et sic de cæteris corporis partibus) deliquisti.*

Hujus Sacramenti Ministri sunt Ecclesiæ Presbyteri.

TITULUS VIII.

De Ordine.

Ordo, est Sacramentum novæ legis, quo potestas sacra ministeria obeundi tribuitur ordinato.

Unum autem est hoc Sacramentum, quamvis sint plures Ordines. quia plenitudo hujus Sacramenti, Sacerdotio continetur; alii vero ejus sunt participatio duntaxat.

Se-

Septem sunt Ordines, puta Ostiariorum, Lectorum, Exorcistarum, Acolytharum, Subdiaconorum, Diaconorum & Presbyterorum.

Horum alii dicuntur minores, alii vero majores.

Minores, sunt a quibus redire ad sæculum permisum est, puta Ostiariorum, Lectorum, Exorcistarum & Acolytharum.

Majores seu sacri, sunt ii a quibus ad sæculum redire non licet, nempe Subdiaconorum, Diaconorum & Presbyterorum.

Cujusque Ordinis materia duplex est, manuum scilicet impositio, & traditio instrumentorum, quæ collatum ordinem designant.

Formam hujus Sacramenti constituunt verba, quibus in eo conferendo, utitur Episcopus, ut in Sacerdotio hæc, *Accipe potestatem offerendi sacrificium in Ecclesia, &c.*

Ordinis Minister est proprius Episcopus.

Ordines Tonsura præcedit, quæ
qui-

pum pertinet aliis vero non competit, nisi ex Privilegio, consuetudine, vel præscriptione.

Conferri debent beneficia intra sex menses, ab eo tempore, quo illa vacare collatori notum fuit, alias devolutioni locus est.

Institutio, est concessio beneficii ad præsentationem, seu nominationem Patroni: quo sensu opponi solet collationi liberæ; institutio enim proprie sumpta, libera non est, nec enim potest Ordinarius præsentatum a Patrono, nisi indignus sit, repellere.

Differt institutio a præsentatione, quoniam Patronus præsentat, instituit Ordinarius; per præsentationem beneficium non acquiritur, acquiritur vero per institutionem.

Institui non debent, nisi personæ idoneæ.

Nemo se ipsum instituere potest sicut nemo potest se ipsum præfektare.

Denique institutio a Laïcis facta non valet.

TITULUS XVI.

De Jure Patronatus.

Jus Patronatus est jus præsentandi Clericum ad Beneficium vacans; in hoc enim potissimum jus Patronatus consistit.

Illud jus introductum est præter juris communis regulas; ad remunerandam, & provocandam fidelium in Ecclesias, liberalitatem.

Duplex jus Patronatus distinguitur, Ecclesiasticum & Laicum; Ecclesiasticum est quod ex bonis Ecclesiæ provenit, & competit Clerico ratione beneficii; Laicum vero est quod aliunde provenit; puta ratione sanguinis aut patrimonii, sive Laico competat, sive Clerico; quia non ex persona ejus, cui competit æstimatur; sed ex varia natura bonorum, ex quibus comparatum est.

Addunt interpretes jus Patronatus mixtum, quod corporibus mixtis competit, veluti Academiis, Collegiis &c. Illa autem corpora

mi-

DE JURE PATRON. 75

mixta sibi ex utroque vindicant,
quod in alterutro est optimum.

Inter Patronos Ecclesiasticos, &
Laicos id interest.

1. Quod Laicis quatuor duntaxat
menses ad præsentandum concedantur,
sex vero Clericis.

2. Quod Patronus Laicus variare
possit, non item Ecclesiasticus.

3. Quod Patroni Laici præveniri
non possint a summo Pontifice, vel
ab ejus legato; possint vero Ecclesiastici.

In tribus consistit jus Patronatus,
ut docent hi versiculi.

Patrono debetur honos, onus, utilitasque,

Præsentet, præsit, defendat, alatur egenus.

Honos maxime consistit in jure
præsentandi, & in sedis, ac processionis honore.

Onus in cura, & tuitione Ecclesiæ consistit.

Utilitas vero consistit in eo quod
Patrono egenti congrua alimenta

D 2. pro

76 DE JURE PATRON.

pro modo facultatum Ecclesiæ præstari debeant.

Acquiritur jus Patronatus tribus modis, qui hoc versiculo designantur.

Patronum faciunt, dos, ædificatio fundus.

Acquiritur autem ædificatione, & quidem statim ac ipso jure.

Dotatione acquiritur; quoniam qui dotat Ecclesiam videtur dare esse Ecclesiæ, siquidem Ecclesia sine dote consecrari non potest.

Fundatione acquiritur; quoniam absque beneficio ejus, qui fundum dedit Ecclesiæ ædificandæ causa, nullum esset cæterorum beneficium.

Transfertur jus Patronatus venditione fundi, si reale sit.

Amittitur vero, si Patronus jus suum Ecclesiæ remiserit; si bona Ecclesiæ usurpaverit; si Clericum ipsius Ecclesiæ per se, aut per alios occidere aut mutilare præsumpserit; vel si venditione aut alio quocumque

DE JURE PATRON. 77

que titulo contra Canonicas sanctiones jus illud acquisierit.

Cæterum præscriptione jus Patronatus acquiritur simul & amittitur; cum hoc tamen discrimine; quod jus in Ecclesia jam Patronata possit contra Patronum spatio 40 Annorum præscribi, secundum sententiam quorundam interpretum; Ecclesia vero libera, non possit juri Patronatus fieri obnoxia, nisi multiplicatis præsentationibus per tempus, quod hominum memoriam superet.

TITULUS XVI.

De Censibus, Exactionibus, & Procuracionibus.

Census est pensio Annua debita Episcopo in honorem Cathedræ & in signum subjectionis, nec non quandoque Patrono, ratione juris Patronatus.

In ipsa fundatione imponi debet; sed post, nec augeri, nec novus imponi potest.

Solvi debet ad antiquam monetam, vel si in usu esse desiit, ad ejus æstimationem

Exactiones sunt extraordinaria quædam subsidia, quæ Prælati justa de causa petentibus solvi debent; dico justa de causa, alias essent exactiones indebitæ a quibus Prælati jubentur abstinere.

- Procuratio nihil aliud est, quam exhibitio, quæ Prælato a Parochis, propter visitationem debetur.

Dicitur *exhibitio*, ad quam pertinet, ut moderata sit. ut in specie præstetur, id est, in victualibus; Parochi enim eam in pecunia numerata præstare non coguntur.

Dicitur *propter visitationem*, procuratio enim visitationi annexa est; quapropter exigi tantum potest cum sit visitatio, & ab iis, qui visitationis officio personaliter funguntur; debet vero Episcopus semel tantum in Anno Ecclesias suæ Diocesis visitare, necnon Monasteria.

TITULUS XVIII.

De Decimis, Primitiis, & Oblationibus.

DECIMÆ sunt fructuum, & cuiuslibet honesti redditus certa portio, quæ in signum & recognitionē universalis dominii, Deo debetur, ministris Ecclesiæ præstanda.

Dicitur *certa portio*, quæ varia est, pro varia locorum consuetudine; inde tamen decimæ dictæ sunt, quia regulariter sunt decima pars frugum.

Dicitur *in recognitionem universalis dominii*, unde ipsorum tributorum exactionem præcedunt.

Primitiæ sunt, primi quique fructus, scetusve, qui Deo in gratiarum actionem debentur.

Oblationes sunt dona, & munera, quæ Christiani Sacerdotibus, pro peccatis suis, ad Altare offerunt.

Dividuntur decimæ in prædiales, personales & mixtas.

Præ-

Prædiales sunt ea, quæ ex fructibus prædiorum percipiuntur.

Personales sunt, quæ ex cujusque industria & artificio procedunt ut ex venatione, conductione vectigalium; sed illarum decimarum præstatio ubique fere exolevit,

Mixtæ sunt quæ partim ex prædio, partim ex industria procedunt, ut quæ ex animalium foetibus, lana lacte aut molendinis, vel piscariis debentur. Sed ejusmodi decimæ eodem jure censentur, quo prædiales.

Inter prædiales & personales id discriminis interest.

1. Quod prædiales debeantur Parrocho in cujus Dioecesi prædia sita sunt, personales vero solvantur Ecclesiæ, in qua Sacramenta percipiuntur.

2. Quod illæ præstentur non deductis impensis, quæ tamen in personalibus deducuntur.

A Deo institutæ decimæ, & divina constitutione deberi dicuntur, inspecta scilicet origine; at in lege

DE DECIMIS. 81

nova obligatio solvendarum decimarum juri tantum Ecclesiastico tribuitur.

Jus illarum percipiendarum spirituale est, quia, propter ministerium spirituale competit, unde a Laicis possideri, aut præscribi non potest.

Decimas solvere omnes regulariter tenentur, nisi ab iis solvendis speciali Privilegio exempti sint.





LIBER TERTIUS.

TITULUS I.

De Judiciis.

JUDICIUM est legitima causæ disceptatio, apud competentem judicem litis finiendæ causa.

Judicium constat, litigantibus potissimum, & Judice.

Circa litigantes præsertim inspicendum est, ut legitimam personam standi in judicio habeant.

Litigantium autem alter est Actor, qui ad Judicium provocat, alter vero Reus, qui convenitur.

Judex est, qui jure proprio, vel alterius delegatione, jurisdictionem exercet; ille talis esse debet, qui legibus, aut moribus judex esse non prohibeatur.

Judicii duæ sunt præcipuæ partes, initium scilicet & finis, initium est

li.

litis contestatio, finis vero est sententia Judicis, quæ plerumque Judicii nomine designatur, addi potest & medium causæ, scilicet testium, aliarumque probationum discussiones.

Judicium aliud est Ecclesiasticum aliud sæculare. Ecclesiasticum est quod coram Judice Ecclesiastico agitur. Sæculare est quod agitur coram Judice sæculari.

Rursus judicium aliud Possessorium est, aliud petitorium. Possessorium est illud in quo de Possessione, vel quasi Possessione controversatur. Petitorium est illud in quo controversatur de proprietate.

Præterea Judicium, vel est summarium, vel plenarium, seu ordinarium. Summarium est illud quod fit de plano, non servatis iis omnibus, quæ ad judiciorum formam desiderantur. Plenarium contra est quod fit servatis omnibus quæ ad Judiciorum formam desiderantur.

Denique aliud civile est, aliud

criminale. Civile est, in quo agitur de negotio civili, seu de re familiarum. Criminale est, in quo de crimine agitur ratione poenae; aliquando enim civiliter duntaxat de crimine agitur.

TITULUS II.

De in Jus vocando seu citatione.

Judiciorum civilium præparatoria sunt in jus vocatio, libelli oblatio, & reconventio, seu mutua petitio.

In jus vocatio seu citatio est actus quo quis Judicis mandato aliquem in jus vocat.

Vocari debet Reus ad forum competens, sive ad Judicem competentem.

Forum est locus in quo judicia exercentur; competens autem dicitur in quo Reus tenetur iudicium pati; circa quod hæc regula servatur, ut Actor forum Rei sequi debeat.

Sic Clericus, qui adversus Laicum

cum aliqua actione experiri vult, ea experiri debet apud Judicem sæcularem.

Similiter Clericus, apud Judicem Ecclesiasticum conveniri debet sive a Clerico sive a Laico Actore; in tantum ut Clericus fori Privilegio renuntiare non possit.

Forum sortitur Reus 1. ex loco domicilii. 2. Ex loco contractus. 3. Ex loco ubi sitæ res de quibus agitur. 4. Ex causa delicti.

TITULUS III.

De Libelli Oblatione.

Facta semel in jus vocatione, debet imprimis actor suam intentionem Reo & Judici exponere, vel viva voce, ut in levioribus causis, vel per libellum legitime confectum ne scilicet Actori variare liceat, aut Reus dubitare possit, ad quid sit respondendum.

Est autem libellus, breve quoddam scriptum, rem quæ petitur, causam petendi, Judicis, Actoris
&

& Rei nomen continens, & præterea Actoris subscriptione munitum. Si tamen quid per errorem prætermissum fuerit, poterit ante litis contestationem emendari.

Libello tenetur Reus respondere, intra certum tempus, quod vulgo, viginti dierum est, per quod deliberet, an contendere, an Judicem admittere; aut recusare debeat.

TITULUS IV.

De Mutuis Petitionibus.

Evenit aliquando ut Actor dato libello mutua petitione conveniatur, quo casu debet apud eundem Judicem respondere, licet alias competens non sit.

Est autem mutua petitio, reconventio, quæ coram eodem Judice, contra Actorem fit, debetque simul cum causa conventionis, uno eodemque iudicio terminari.

TITULUS V.

De Litis Contestatione.

Absolutis iudicii præparatoriis, sequitur ipsius iudicii principium & fundamentum, quod est litis contestatio.

Illa definitur litis declaratio, apud Judicem facta, petitione ab Actore proposita, & allegata a Reo exceptione, super quibus aliqua pronuntiatio Judicis intervenit.

Præcipui hujus effectus sunt 1. ex parte Judicis, ut jurisdictionem ipsi demandatam perpetuet, & ut in præjudicium unius litigantis nihil innovari queat.

2. Ex parte Actoris, ut libellum mutare non possit, ut rem litigiosam faciat, interrumpatque usucapionem.

3. Ex parte Rei, ut Possessorem in mala fide constituat.

4. Ut novationem inducat, & ab ea Judicium incipiat.

TITULUS VI.

De Probationibus.

Lite semel contestata, Judicis instruendi causa, probationes hinc inde admittendæ sunt.

Probationes sunt argumenta, quibus veri fides constare potest; cuiusmodi sunt testes, instrumenta, fama, aliaque adminicula.

Horum non est eadem ratio; testes enim & instrumenta plenam fidem faciunt. fama vero per se sola potest quidem aliquando movere Judicem, sed plenam probationem non facit.

Coeterum ei incumbit onus probandi qui dicit, non ei qui negat, factum enim negantis, per rerum naturam probatio non est.

TITULUS VII.

De Testibus & Attestationibus.

Testis sunt personæ, quæ negotiis alienis, fidei faciendæ causa

DE TEST. & ATT. 89

interfunt; attestations vero, sunt ipsa testium testimonia, seu dicta.

Circa testes hæc potissimum observanda sunt, 1. Ut injuratis testibus non credatur.

2. Ut quoties numerus testium lege definitus non est, duo sufficiant & desiderentur.

3. Ut ii omnes ad testimonium dicendum admittantur, qui dicere non sunt prohibiti, ut impuberes, criminosi, mulieres, & Laici adversus Clericos in causa criminali, quando criminaliter agitur.

TITULUS VIII.

De Fide Instrumentorum.

Instrumenta sunt tabulæ sive scripturæ, quæ rei, de qua agitur, fidem faciunt.

Instrumentorum, alia sunt privata, quæ a privatis conficiuntur, ut Chyrographus, alia publica quæ a Tabellione fiunt.

Privata non alias fidem faciunt, quam si ea Author ipse agnoverit, aut

ut comparatione litterarum, appareat cujus sint.

Publica certam fidem faciunt, non solum authentica, seu originalia, sed etiam exempla, & descripta, modo publica manu, & jussu Judicis conscripta fuerint.

TITULUS IX.

De Jurjurando.

Deficientibus plenis probationibus defertur quandoque Jusjurandum.

Definitur Jusjurandum invocatio divini numinis, qua petimus, ut sit testis nostræ asservationis, fallentesque puniat; vel dici potest affirmatio religiosa fidei faciendæ causa, quæ sit sub attestatione divini numinis, vel sub devotione sui.

Ut licitum sit, tres comites habere debet, nempe veritatem, hoc est conscientiæ testimonium: Judicium, id est discretionem, ac delibe-

DE JUREJURANDO. 91

berationem, ne temerarium sit: & justitiam, ut quod juratur justum sit & licitum.

Jusjurandum, aliud promissorium est, quod alicujus conventionis confirmandæ causa adjicitur; aliud assertorium, quo rei præsentis, vel præteritæ veritas confirmatur; cum autem, litis finiendæ causa, interponitur, vocatur decisorium.

TITULUS X.

De Præsumptionibus.

Præsumptiones quandoque animum Judicis movent, etiam deficientibus probationibus; certe præsumptio rejicit onus probandi in eum contra quem facit.

Sunt autem præsumptiones conjecturæ, quæ ex ipso facto, ejusque circumstantiis deducuntur.

Quatuor sunt præsumptionum species, temerariæ scilicet, probabiles, violentæ & necessariæ.

Temerariæ sunt, quæ ex levibus causis proficiscuntur; veluti gesta-

tio

tio annuli, ex qua quis Matrimonium probare vellet; tales autem animi Judicis movere non debent.

Probabiles sunt, quæ ex verisimili argumento deducuntur, veluti ut quod remotioribus notum est, a vicinis non ignoretur; hujusmodi præsumptio habetur pro veritate, nisi contrarium probetur.

Violentæ quæ & præsumptiones Juris dicuntur, sunt eæ, quæ ex pluribus indiciis, aut uno plurimum efficaci conflatae sunt, qualis fuit præsumptio Salomonis veram Matrem ex sincero affectu dijudicantis; & adversus eam vix admittitur probatio.

Necessaria præsumptio quæ vulgo dicitur præsumptio Juris & de Jure, est dispositio legis aliquid super præsumpto, quasi sibi cognito statuentis: sic sponsalia de futuro præsumuntur transiisse in sponsalia de præsentī, si copula intervenerit.

TITULUS XI.

De Exceptionibus.

Exceptio est actionis exclusio, exceptionum præcipua divisio fit in perpetuas, & temporales.

Perpetuæ seu peremptoriæ, sunt quæ semper agentibus obstant, & Actoris intentionem excludunt, ut exceptio rei judicatæ, doli mali, vis, vel metus, & similes.

Temporales seu dilatoriæ sunt quæ ad tempus duntaxat nocent, & Actoris intentionem non perimunt, ut exceptio fori, excommunicatio- nis, & similes.

Perpetuæ exceptiones objici possunt etiam post litem contestatam; dilatoriæ vero ante litem contesta- tam in ipso litis ingressu regulari- ter opponendæ sunt.

Cæterum sicut onus probandæ actionis Actori incumbit, ita etiam onus probandæ exceptionis incum- bit Reo.

TI-

Sententia & res judicata differunt, tanquam causa & effectus: Sententia enim rem judicatam facit, videlicet postquam appellandi tempus elapsum est.

- Sententia est decretum Judicis ad litis ordinationem, vel ad ejus decisionem latum.

Duplex distinguitur, interlocutoria, scilicet & definitiva.

Interlocutoria est decretum Judicis, quod inter principium & finem litis fertur ad ejus ordinationem, & præparationem tantum, veluti cum Judex concedit, vel deneget dilationes ad testes examinandos, vel exhibenda instrumenta.

Definitiva est decretum a Judice interpositum de summa, vel capitulo litis, absolutionem vel condemnationem certam Actoris, aut Rei continens.

Porro ut Sententia rite feratur, quædam desiderantur. 1. Ut

DE SENT. & RE JUD. 95

1. Ut in loco majorum, congruo tempore, & non die feriato, per ipsum Judicem recitetur.

2. Ut certa sit, libelloque conformis, & ut secundum allegata & probata, servato Juris Ordine, proferatur.

3. Ut nihil contineat quod contra leges sacrosve Canones sit; etenim sententia lata contra leges, sacrosve Canones, ipso Jure nulla est; non item si contra jus litigantium lata sit, tunc enim ipso jure valet & ad eam rescindendam, appellati-
onis remedio opus est.

TITULUS XIV.

De Appellationibus.

Appellatio est Sententia Judicis inferioris ad Superiorem facta provocatio, ratione gravaminis illati vel inferendi.

Ab omni sententia appellare licet, ita ut non tantum a Sententia definitiva Jure Canonico appellare liceat, verum etiam ante, puta
ab

ab interlocutoria, imo ante litis ingressum appellare licet, a quocumque gravamine illato; vel inferendo.

Non admittitur tamen appellatio a Sententia correctionis, quoniam a Sententia correctionis appellare, ab ipsa regula appellare est.

Ab omnibus Judicibus appellare permittitur: fitque appellatio a sententia inferioris Judicis ad superiorem gradatim, id est non omisso medio.

Bis tantum in qualibet causa appellare permittitur.

Appellationis interponendæ causa decem dies dantur; semel autem interposita appellatio intra annum, aut si per Judicem, vel casum majorem trahatur; intra biduum peragenda est.

Duplex est appellationis effectus; primus, ut suspendat executionem sententiæ; secundus est, ut devolvat causæ cognitionem ab inferiori Judice ad superiorem.

quidem ex Ordinum numero non est, sed præparatio ad Ordines duntaxat.

TITULUS III.

De Matrimonio.

Matrimonium præcedunt sponsalia. 1. Ut sponsi suos invicem mores probare possint, & ne vilem habeat sponsus datam, quam non diu suspiraverit dilatam. 2. Ut præparentur interim ea, quæ ad Matrimonium necessaria sunt.

Quin & præmitti debet Matrimonio trium bannorum publicatio, ut si aliquod subfit Matrimonio impedimentum, detegatur.

Sunt autem sponsalia mentio & repromissio futurarum nuptiarum.

Duplicis generis Jure Canonico distinguuntur, sponsalia scilicet de præsentī. & sponsalia de futuro.

Sponsalia de præsentī sunt ea, quæ per verba de præsentī contrahuntur, ut, *Ego accipio te in uxorem, ego accipio te in virum.*

C

Spon-

Sponsalia de futuro sunt ea, quæ per verba de futuro contrahuntur, puta, *Ego te accipiam in uxorem, & vice versa.*

Sponsalia de præsentî, quantum ad fœdus, & vinculum, a Matrimonio rato duntaxat, non distinguuntur, adeo ut, licet sponsalia de futuro solvantur, per sponsalia de præsentî; illa tamen, licet copula secuta non sit, non dirimantur per posterius Matrimonium, etiam consummatum; unde sponsalia illa differunt a Matrimonio sola Sacerdotis benedictione: sed prohibita sunt Concilio Tridentino, & apud nos Blesensi Constitutione.

Sponsaliorum de futuro duo sunt præcipui effectus.

Primus est, ut inducant obligationem contrahendarum nuptiarum quod tamen ita intelligendum est, ut, si fieri possit, ex nolentibus volentes fiant; alias summo jure compellendi non sunt.

Secundus est, ut pariant justiti-

am publicæ honestatis, cujus ratione, qui cum aliqua muliere sponsalia contraxit, ejus consanguineam ducere prohibetur, & vice versa.

Matrimonium considerari potest, vel quatenus est contractus, vel quatenus est Sacramentum.

Quatenus est contractus, definitur viri, & mulieris conjunctio, individuum vitæ consuetudinem continens.

Quatenus consideratur ut Sacramentum, definiri potest, Sacramentum novæ legis, quo vir & mulier liberorum procreandorum causa, perpetuam vitæ societatem ineunt.

Dicitur *Sacramentum novæ legis*; fuit enim institutum a Christo; Matrimonium tamen a Deo institutum est in Paradiso terrestri, his verbis quæ primus parens suggerente spiritu sancto protulit, *Hoc nunc os ex ossibus meis, & caro de carne mea, propter quod relinquet homo patrem & Matrem & adhærebit uxori suæ & erunt duo in carne una.* Sed Chri-

Itus eadem verba repetens. Matrimonium evexit ad dignitatem Sacramenti, quod gratiam conjugatis confert.

Materia hujus Sacramenti sunt personæ contrahentes, vel ipsarum consensus.

Forma sunt verba consensum exprimientia.

Minister vero alius non est quam ipsi conjuges, quia verba, quibus hujus Sacramenti forma constat, ipsi proferunt, ministri autem est, verba, quibus Sacramenti cujusque forma constat, pronuntiare & per ea Sacramentum conficere.

Matrimonium triplex distinguitur, aliud dicitur legitimum & non ratum: aliud ratum & non legitimum: aliud denique legitimum & ratum simul.

Legitimum & non ratum, est quod ab infidelibus, juxta eorum leges & mores, contractum est.

Ratum & non legitimum, est quod inter Fideles seu Christianos, solo
con-

consensu, sed omissis solemnitatibus, contractum est.

Legitimum & ratum simul est quod a Fidelibus, secundum regulas & juris solemnitates, celebratum est; ratum quidem dicitur, quia firmum illud & ratum habet Ecclesia: legitimum vero, quoniam juris solemnia adhibita sunt.

Ad Matrimonium contrahendum debent masculi esse puberes: foeminae autem viri potentes; sed sponsalia effici possunt, modo qui ea contrahunt minores non sint septennio. Præterea celebrari debet Matrimonium a proprio Parocho, præmissis inter missarum solemnia trium bannorum, ut ajunt, publicationibus. Deinde si nullum opponatur impedimentum, ad celebritatem Matrimonii procedi potest a Parocho.

Edictum de Matrimonio contrahendo, est prohibitorium, proinde ab omnibus qui specialiter prohibiti non sunt, contrahi potest.

Impedimentorum autem. Cano-

nicorum duo sunt genera; alia & contrahendum Matrimonium impediunt, & contractum dirimunt: idcirco impedimenta dirimentia nuncupantur; alia vero dicuntur prohibentia: quæ contrahendo quidem Matrimonio obstant, sed contractum non dirimunt.

TITULUS X.

De Dirimentibus impedimentis Matrimonii.

Impedimenta dirimentia quatuordecim enumerantur; ex quibus duodecim priores sunt Juris veteris, quibus duo addidit Synodus Tridentina; & omnia illa impedimenta versibus sequentibus continentur.

Error, Conditio, Votum, Cognatio, crimen,

Cultus disparitas, Vis, Ordo, Ligamen, Honestas,

Si sis Affinis, si forte coire nequibis:

*Si mulier sit rapta, loco nec red-
dita tuto. Si*

*Si Parochi & duplicis defit præ-
sentia testis: -*

*Hæc socianda vetant connubia,
facta retradant. ●*

*Error, circa personam ipsam, ab
initio efficit Matrimonium nullum,
quia consensu perficitur, sed non
consentiunt qui errant; similiter er-
ror circa conditionem servilē, seu
statum personæ, vitiat Matrimoni-
um. ●*

*Error autem non obest, si verse-
tur circa qualitatem personæ vel al-
liud quidpiam, veluti, quod mulier
sit nobilis vel dives,*

*Conditio adjecta Matrimonio ip-
summet vitiat, si nempe substantiam
Matrimonii impugnet, veluti, con-
traho tecum, si generationem pro-
lis evites; vel donec inveniam aliam
honore, facultatibusve digniorem.*

*Votum, impedit etiam Matrimo-
nium & dirimit, si sit solemne.*

*Solemne autem votum est, quod
sit sacrorum Ordinum susceptione,
vel professione vitæ regularis.*

56 *DE DIR. JM. MAT.*

Cognatio definitur Jure Canonico, sanguinis, vel familiæ, aut Sacramenti vinculum. Et hoc Jure triplex distinguitur, naturalis scilicet, quæ consanguinitas appellatur, civilis, seu legalis, & spiritualis.

Naturalis, seu consanguinitas, ab interpretibus Juris Canonici definitur vinculum sanguinis, ex quacunque carnali propagatione proveniens.

Legalis est vinculum familiæ, quæ ex adoptione oritur, inter eos qui per adoptionem sibi invicem agnoscuntur. Illa autem cognatio dissoluta adoptione extinguitur.

Spiritualis est necessitudo personarum ex Baptismo, vel ex Confirmatione, aut ex Cathechismo proveniens.

Hodie ex Concilio Tridentino, cognatio spiritualis non contrahitur nisi inter baptisantē & baptisatum. ejusque patrem & matrē: sicut inter suscipientem & susceptum, ejusque patrem & matrem.

Quæ

Quæ autem ex Confirmatione oritur, confirmantem & confirmatum, illiusque patrem & matrem, ac tenentem non egreditur.

Tridentina etiam Synodo sublata fuit cognatio spiritualis, quæ ex Catechismo olim oriebatur.

Ratione naturalis cognationis, nuptiæ in infinitum prohibentur in linea recta, & in collateralis, inter eos qui speciem parentum & liberorum referunt; at inter cæteros collaterales nuptiæ in quarto duntaxat gradu, jure Canonico reprobantur.

Est autem linea, series cognatorum, quæ duplex distinguitur, recta scilicet & collateralis.

Recta est ordo, seu series parentum & liberorum, seu eorum quorum unus ab alio descendit.

Collateralis vero, est ordo seu series eorum, quorum neuter ab alio descendit, sed uterque a communi stipite.

Gradus est distantia cognati ab

altero, quæ ex ordine cognationum spectatur.

Jure civili gradus in utraque linea computantur ex numero personarum genitarum, adeo ut quælibet persona genita unum gradum adjiciat.

- Jure Canonico gradus computantur in linea recta eodem modo, ac jure Civili; imo & olim etiam in linea collaterali: sed circa tempora S. Gregorii receptum est, ut duæ personæ genitæ in linea collaterali unum tantum gradum efficerent.

Hac nova computandi ratione recepta, duæ ab interpretibus regulæ inductæ sunt.

Prima est, ut quoties collaterales æqualiter distant a communi stipite, eodē inter se gradu distēt, quo alter eorum distat a communi stipite.

Secunda est, ut quoties inæqualiter distant a communi stipite, remotior trahat ad se proximiorē: & tot inter se gradibus distent, quot remotior distat a communi stipite

Cri-

Crimen, nimirum adulterii, & machinationis adversus vitam legitimi conjugis.

Cultus disparitas, id est, Religionis diversitas, quæ nuptiis obstat.

Vis, Matrimonium ab initio nullum reddit, quando nimirum talis est, ut voluntatem omnino excludat: idem dicendum est de metu qui cadit in constantem virum.

Ordo, Presbyteratus nimirum, Diaconatus, & Subdiaconatus.

Ligamen, id est vinculum prioris Matrimonii; nam plures simul habere uxores non licet.

Honestas, est enim publicæ honestatis iustitia, cujus ratione qui cum aliqua muliere sponsalia contraxit, ejus consanguineam ducere prohibetur, & vice versa.

Si sis affinis, affinitas definitur ab interpretibus Juris Canonici attendentia personarum, ex carnis copula proveniens, omni carens parentela; illa autem si Matrimonium præcedat, illud impedit & dirimit.

60 DE DIR. JM. MAT.

Si forte coire nequibis, nam impotentia coeundi, quæ Matrimonium præcedit, si emendari non possit, matrimonium ab initio nullum reddit, quoniam procreandæ sobolis causa matrimonium comparatum est atque inter eos contrahi tantum potest. qui possunt fieri una caro.

• *Si mulier sit rapta, loco nec reddita tuto; raptus enim, seu violenta mulieris Matrimonii causa abductio, connubium adimit inter raptorem & raptam, usquequo loco tuto restituta in eum consenserit.*

Si Parochi & duplicis desit præsentiatestis; Concilium enim Tridentinum eos qui aliter quam præsentem Parocho, vel alio Sacerdote, de ipsius licentia, & duobus vel tribus testibus, Matrimonium contrahere attemptaverint, ad id contrahendum reddit inhabiles & hujusmodi contractus irritos, nullosque esse decrevit.

Verum Blesensis Constitutio præter Parochum, quatuor probatæ fidei
dei

DE J.M. MATR. 61

dei testes desiderat, atque ut testimonia in registro Parochi inscribantur.

TITULUS XI.

De impedimentis Matrimonii prohibentibus.

Impedimenta Matrimonii prohibentia tantum, his versibus referuntur.

Incestus, raptus, sponsalia, mors muliebris,

Susceptus propriae sobolis, mors Presbyteralis,

Vel si poeniteat solemniter, aut monialem

Prudens accipiat, votum simplex Cathecismus,

Ecclesiae vetitum, nec non tempus feriarum,

Impediri fieri, permittunt facta teneri.

Incestus; qui enim consanguineam suam aut affinem cognovit, perpetua solitudine damnatur, sed ab ea quæ uxore ejus antea fuit, non separatur,

Ra-

Raptus alienæ scilicet sponsæ, quia raptor futuro Matrimonio injuriam facit, illudque tentavit impedire.

Sponsalia, nimirum de futuro cum alia prius contracta.

Mors muliebris, qui enim uxorem occidit, cum alia Matrimonium contrahere prohibetur, contractum tamen retinet, excepta ea cujus intuitu uxorem occidit.

Susceptus propriæ sobolis, id est: propriæ sobolis, Matrimonii dissolvendi causa, de sacro fonte susceptio.

Mors Presbyteralis; cædes enim Presbyteri impedit quidem Matrimonium contrahi, sed contractum non dirimit.

Vel si pœniteat sollemniter; publica enim pœnitentia Matrimonii impedimentum est, si non dirimens, saltem impediens.

Aut monialem prudens accipiat, qui Matrimonium scienter cum sanctimoniali contraxit, nunquam ei

con-

conceditur conjugali vinculo religari; illud tamen impedimentum Matrimonii, impediens est tantum, non vero dirimens.

Votum simplex; illud enim Matrimonio contrahendo obstat, sed contractum non dissolvit.

Cathechismus, spiritualis cognatio oriebatur ex Cathéchismo, seu instructione baptifandorum, quæ proinde aliquid sacramentale est; illaque cognatio impediēbat Matrimonium contrahi, contractum vero non dirimebat: sed ex Concilio Tridentino hoc impedimentum sublatum est.

Ecclesiæ vetitum, nec non tempus feriarum: interdictum Ecclesiæ vel speciale est, vel generale.

Speciale, est sententia Judicis Ecclesiastici, quæ pendente lite super causa Matrimonii, prohibet Matrimonium contrahi, sed contractum non dirimit.

Generale est constitutio Ecclesiæ qua generaliter prohibetur, ne per
cer-

certa tempora, quæ pœnitentiæ potissimum, & orationi destinata sunt, Matrimonia contrahantur.

Hæc prohibitio non tam respicit Matrimonium ipsum, quod consensu perficitur, quam ejus solemnitatem & consummationem.

Illa autem prohibitio definita est Concilio Tridentino. ab initio Adventus ad diem Epiphaniæ, & a feria quarta Cinerum, ad octavam Paschatis inclusive.

TITULUS XII.

Qui Filii sint legitimi.

Filii legitimi, vel sunt legitimi tantum, qui per adoptionem fiunt: vel naturales & legitimi simul, qui nimirum ex justo & legitimo Matrimonio nati sunt.

Item, ii qui nati sunt ex Matrimonio Infidelium contracto in gradibus Jure tantum Canonico prohibitis, quo casu, licet conjuges ad fidem Christianam conversi sint, & Matrimonium valet, & liberi justii ac legitimi habentur: Præ-

Præterea ii qui nati sunt ex Matrimonio illicito. sed bona fide, & in conspectu Ecclesiæ contracto; bona autem fides, etiam unius duntaxat parentis; ad confirmandum statum liberorum sufficit.

Legitimi vero fiunt Jure Canonico, qui ex illicita conjunctione nati postea legitimantur, vel per rescriptum summi Pontificis, vel per Matrimonium subsequens, etiam absque dotalibus instrumentis contractum.

Legitimationis quæ sit per rescriptum summi Pontificis, tres species distinguuntur, plenissima nimirum, plena & simplex.

Plenissima, est ea qua S. P. purgata Matrimonii radice, tollit impedimentum quod Matrimonio obstabat, ut cum Matrimonium intra gradus prohibitos contractum speciali rescripto comprobatur.

Plena est qua S. P. non purgata radice Matrimonii aliquem natalibus restituit, eumque facit capacem eorum quæ illegitimis interdicta sunt,

66 QUI FIL. SINT. LEG.

sunt, quantum ad spiritualia.

Simplex, est quæ S. P. nec Matrimonii radicem purgat, nec natalium restitutionem concedit, sed qua idoneum duntaxat aliquem facit ad aliquos actus, qui illegitimis interdiciuntur; ut ad Ordines & Beneficia quæ quidem dispensatio potius quam legitimatio dici debet.

TITULUS XIII.

De Divortiis.

Divortium est legitima conjugum separatio, non privato cujusq; arbitrio, sed iudicio Ecclesiæ facta.

Duplicis generis distinguitur; alterum quo ad thorum & mensam: alterum quoad fœdus & vinculum; illud solam vitæ consuetudinem, hoc vero ipsum Matrimonii fœdus dissolvit.

Divortium quoad thorum & mensam Jure Canonico admittitur pluribus de causis; puta ob fornicationem, (sive corporalis illa sit, sive spiritualis) obstruētas conjugii infir-
di-

alias: ob intolerabilem alterius sævitiam &c.

Divortium quoad vinculum non admittitur Jure Canonico, nisi duobus casibus.

Primus est, si Matrimonium sit ratum tantum, & non consummatum, & alter conjugum, melioris vitæ desiderio accensus, vitam regularem profiteatur, altero etiam invito: Et hoc casu aliud Matrimonium ei licet contrahere, qui in sæculo remanet.

Ratio est, quia quandiu conjuges nondum facti sunt una caro, tacita hæc conditio matrimonio inest, nisi Deus ad meliora vocaverit; & tunc non homo, sed ipse Deus conjuges separat.

Verum postquam per copulam carnalem una caro vir & uxor effecti sunt, mulier sui corporis potestatem non habet, sed vir similiter & vir sui corporis potestatem non habet, sed mulier, ideoque non licet viro sine consensu mulieris,
aut

aut vicissim, vitam regulare[m] profiteri atque; adeo Matrimonium consummatum vitæ regularis professione non dissolvitur.

Itaque si post Matrimonium consummatum unus e conjugibus vitam regularem professus sit, potest alter eum, qui conversus est revocare: sed si eum non repetat, officio Episcopi restituendus est.

Secundus casus, in quo Matrimonium dissolvitur jure Canonico, est si Matrimonium sit legitimum tantum & non ratum, puta si ex duobus conjugibus infidelibus, unus ad fidem convertatur, & alter nolit ei cohabitare: aut certe non aliter, quam cum contumelia Creatoris, id est sine blasphemia in Christum: vel si ipsum pertrahat ad peccatum mortale.

Ratum vero & consummatum Matrimonium Jure Canonico nulla ex causa, quoad vinculum, dirimi potest.

TITULUS XIV.

69

De Beneficiis.

Beneficium Ecclesiasticum est jus utendi, fruendi certis Ecclesiæ rebus, quod Clerico in perpetuum conceditur, propter officium Ecclesiasticum.

Dicitur *jus*, non quidem temporale, sed quasi spirituale; beneficia enim ad Dei cultum, & animarum salutem, atque intuitu Ecclesiastici ministerii instituta sunt.

Dicitur utendi, fruendi; nam verbum *uti* significat, rem adhibere ad necessitatem quotidianam; *frui* vero significat, omnes fructus ex re aliqua percipere, etiam ad compendium.

Porro Canones victum duntaxat, & vestitum, ex redditibus Ecclesiæ, Clericis Concedere videntur, ita ut, si quid supersit illud erogent pauperibus.

Verum aliud obtinet ex generali Ecclesiæ consuetudine, nimirum, ut Clerici, in Beneficiis suis, pro
fru-

fructuariis habeantur. Quapropter possunt hodie Clerici de perceptis beneficiorum fructibus, testamento disponere, vel eos ad hæredes ab intestato transmittere.

Dicitur, *quod Clerico*; quia soli Clerici munera Ecclesiastica obire possunt, proinde beneficia possidere.

Dicitur, *in perpetuum*, hoc est ad vitam Clerici, vel quandiu in Ecclesia, in qua intitulatus est Clericus perseverabit; mortuo autem Clerico ad ejus heredes non transmittitur; quia sanctuarium Dei Jure hereditario possideri non potest.

Tres sunt præcipuæ Beneficiorum divisiones.

Prima fit in sæcularia & regularia.

Sæcularia sunt, quæ sæcularibus Clericis assignantur.

Regularia sunt, quæ solent gubernari per regulares illius Ordinis cui adscripta sunt.

Secunda fit in compatibilia, & incompatibilia. Com-

DE BENEFICII. 71

Compatibile beneficium est, cui nec cura animarum, nec actualis in Collegio residentia incumbit.

Incompatibile est cui, vel cura animarum, vel actualis in Collegio residentia incumbit, unde duo simul teneri non possunt.

Tertia Beneficiorum divisio est, in dignitates, personatus, & officia.

Dignitas est administratio, cum Jurisdictione & honore conjuncta, ut Decanatus, & Archidiaconatus.

Personatus est administratio cum honore, sed sine jurisdictione: puta Cantoria; honor autem est prerogativa sedis, suffragii, & processioneis.

Officium, est administratio sine jurisdictione & honore, ut officium Sacristiae.

Porro circa beneficia quaedam generales regulæ tradendæ sunt.

Prima est, ut beneficia Ecclesiastica non nisi dignis conferantur, id est: iis qui sanctitate morum, necnon doctrina perfulgent, & idoneæ sunt ætatis.

Se-

72 *DE BENEFICIIS.*

Secunda est, ut admittenda non sit cumlatio beneficiorum, si incompatibilia sint.

Tertia est, ut sicut beneficia cumulari, ita nec fecari, & dividi debeant.

Quarta est. ut antequam vacent, neque promitti, neque conferri possint, scilicet ad removendam corvinam sollicitudinem, & votum captandæ mortis alienæ & præterea ne viventi successor detur.

TITULUS XV.

Quib9 modis beneficia acquirantur.

Diximus libro primo, quibus modis majora Beneficia acquirantur, nunc dicendum est, quibus modis acquirantur alia beneficia; acquiruntur autem per collationem, aut institutionem.

Collatio est libera beneficii vacantis, ab eo qui jus habet, Canonice facta concessio.

Collatio autem beneficiorum totius Diocesis regulariter ad Episcopum

LIBER QUARTUS.

TITULUS I.

*De Accusationibus, Inquisitionibus
& Denuntiationibus.*

CRIMINA solent coerceri, vel ad delationem & postulationem alterius, nimirum per accusationem, & denuntiationem, vel nemine deferente, & solo Judicis officio, puta per inquisitionem.

Itaque crimina tribus modis vindicantur, accusatione, inquisitione; & denuntiatione.

Accusatio est delicti delatio solemnisi, apud competentem Judicem, vindictæ gratia, facta.

Dicitur *solemnis*, ad quod requiritur. I. Ut adsit legitimus accusator, qui Judici accusationem in scriptis offerat, & præsens præsentem accuset.

E

Le-

Legitimus accusator intelligitur quicumque accusare specialiter prohibitus non est, ut inimici, conspiratores, excommunicati, infames, & quidam alii.

2. Ut fiat sub inscriptionis vinculo; est autem inscriptio libellus, quo continetur nomen Actoris & Rei, genus, locus, tempusque criminis admissi, & quo promittit accusator se perseveraturum in Iudicio ad finem litis. & se subicit pœnæ Talionis si calumniose accusasse probetur.

Inquisitio est investigatio criminis a Iudice ex officio instituta,

Hæc ideo recepta est ne deficiente accusatore crimina maneant impunita; Magistratus enim curare debent ut Respublica malis hominibus purgetur.

Fit igitur inquisitio ex Iudicis officio, sed eam procedere debet fama publica, eaque ex plurium & gravium personarum relatione conflata, quapropter fama dicitur vicem accusatoris sustinere. De-

Denuntiatio est dilecti delatio quæ fit ad Magistratum, circa accusationis solemnia, commendationis causa, non vero vindictæ gratia.

Denuntiationi autem caritativa monitio præmittenda est, ne alias negotii potius faciendi studio, quam zelo caritatis impellente, procedere videatur.

Itaque ne facilis sit & temeraria criminum objectio accusationem præcedere debet inscriptio, inquisitionem clamorosa insinuatio, & denuntiationem caritativa monitio.

Criminum alia præsertim divinam Majestatem, alia præcipue homines lædunt.

Prioris generis sunt, Simonia, Hæresis, Schisma, Apostasia, Blasphemia, & Sortilegium.

Posterioris generis sunt Homicidium, Adulterium, Stuprum, Raptus, Incestus, Falsum, Furtum, Rapina, Usura, &c.

TITULUS II.

De Simonia

Nomen accepit crimen illud a Simone Mago, qui pecuniam obtulit Apostolis, ut ad eorum exemplum per manuum impositionem dandi Spiritus Sancti potestatem consequeretur.

Simonia est studiosa voluntas emendi, vendendique spiritualia, aut spiritualibus annexa.

Dicitur *Studiosa voluntas*, quia cum spiritualia in commercio non sint, nulla earum venditio esse potest; unde qui pro spiritualibus pretium dat, ea quidem emere studet, revera tamen non emit.

Dicitur *emendi vendēdique* ubi notandum est, emptionis, venditionis nomine quodlibet negotium non gratuitum intelligi, seu quod munus pretiumve, aut ejus loco aliquid intervenit.

Dicitur *Spiritualia aut Ec.* per spiritualia hic intelliguntur gratiae quæ

DE SIMONIA.

101

quæ proficiscuntur a Deo, ut dona Spiritus Sancti, sacramenta; spiritualibus vero annexa sunt, vasa sacra, beneficia, jus Patronatus, &c.

Dividitur simonia in realem, conventionalem, & mixtam.

Realis est quæ traditione completur ex utraque parte, vel saltem inchoatur.

Conventionalis est pactio, de re temporali danda, pro spirituali.

Mentalis est quæ mente concipitur aliquo actu subsecuto, ut cum aliquid temporale datur animo & affectu accipiendi aliquid spirituale, vel contra; quæ quidem Simonix species Deum solum ultorem habet.

Altera circumfertur Simonix divisio, nimirum ut altera juris divini esse dicatur, altera Ecclesiastici, seu ut loquuntur, quædam dicuntur prohibita, quia sunt Simoniacæ, quædam vero Simoniacæ dicuntur, quia prohibita sunt.

Primi generis sunt ea quæ sui naturæ, in veteri etiam testamento

vendi prohibita sunt, veluti Sacramenta, gratiæ, dona Spiritus Sancti.

Secundi generis sunt ea quæ quidem sui natura in venditionem cadunt, sed quæ citra peccatum non possunt vendi, propter nimirum Constitutionem Ecclesiæ, quæ ea vendi prohibuit, ob reverentiam rerum spiritualium quibus annexa sunt, ut Præbendæ, jus Patronatus, &c.

TITULUS III.

De Hæreticis, Schismaticis, & Apostatis.

HÆRETICI sunt, qui a sententia & tramite Catholicæ Religionis aberrantes, alienam a mente Ecclesiæ doctrinam profitentur, eamque pertinaciter defendunt. Hæreticum enim error non facit, sed in errore pertinacia.

Hæreticos autem propter contractam Baptismo obligationem merito coercet Ecclesia, non item Judæos, Sarracenos, & Paganos in quos

quos nullum habet imperium.

Schismatici sunt ii qui se Christi Vicario non subicientes, separantur ab unitate Ecclesiæ, quæ uno eodemque spiritu continetur.

Illi ab Hæreticis maxime differunt, hæresis enim est diversa sequentium secta, Schisma vero eadem sequentium separatio; Hæretici de Deo falsa sentiunt, Schismatici vinculum unitatis dissolvunt, & quamvis eadem quæ credimus credant, iniquis tamen discissionibus a fraterna charitate dissiliunt.

Apostatæ sunt ii qui fidem, aut regularem vitam, aut ordinem deserunt. Apostatæ enim dicuntur 1.

Qui susceptam fidem deserunt, & ad Judaicam, Paganam, aut Machometanam impietatem transeunt. 2.

Qui monasticum habitum abjiciunt. 3. Qui susceptum ordinem deserunt.

TITULUS IV.

De Homicidio.

Homicidium est hominis ab homi-

104 *DE HOMICIDIO.*

mine facta occisio, aliud voluntarium est, aliud necessarium, aliud casuale.

Voluntarium est illud, quod fit consulto, data opera, odii puta, aut vindictæ gratia.

Necessarium est, quod fit ex necessitate, vitæ adversus aggressorem tuendæ causa.

Casuale est, quod a non cogitante per imprudentiam inconsulto committitur.

Cæterum nemo ignorat homicidium gravissimum crimen esse, cum neque fortuito, neque necessitate ad id impellente, committitur.

TITULUS V.

De Adulterio, Stupro, Incestu, & Raptu.

Adulterium est alieni tori violentio; á stupro differt, quod adulterium cum nupta committatur, stuprum vero fit fornicatio quæ

com-

DE FURTO.

105

committitur cum vidua, aut Virgine honeste vivente.

Incestus est illegitima cum cognata, aut affini in gradu prohibito conjunctio.

Raptus est mulieris abductio.

TITULUS VI.

De Furto & Rapina.

Furtum est rei contrectatio fraudulosa, lucri faciendi gratia vel ipsius rei, vel etiam usus ejus; possessionisve, quod lege naturali prohibitum est admittere.

Rapina est violentum & improbum furtum, seu violenta rei corporalis ablatio.

TITULUS VII.

De Usuris.

Usura Jure Canonico est quidquid ultra sortem exigitur, vel est

ad sortem debitam quælibet accessio.

Præcipua usurarum divisio fit in lucratorias, punitorias, & compensatorias.

Lucratoriæ sunt quæ pro ipso pecuriæ usu, & propter merum lucrum creditori præstantur, quæ fœnoris nomine designari solent.

Punitoriæ sunt pœnæ frustrationis & moræ, quæ debitori procrastinanti & congruo tempore non solventi infliguntur.

Compensatoriæ sunt quæ præstantur creditori ratione ejus quod interest; id autem quod interest definitur id quod abest alicui, quodque lucrari potuit, seu damnum emergens, & lucrum cessans.

Illud vero quod interest neque merum lucrum est, ut fœnus, neque mera pœna, ut usura punitoria, sed utilitatis amissæ reparatio; unde modum a quantitate sortis non accipit, quippe quam superare potest modo tamen duplum ejus non excedat.

Usu-

Usuræ punitoriæ Jure Canonico non prohibentur, saltem si non petantur tanquam mea pœna; sed tanquam id quod interest.

Non prohibentur compensatoriæ; unde gener dotis promissæ fructus in dotem imputare non tenetur, sed eos recte compensat cum oneribus Matrimonii quæ ei sustinenda incumbunt. •

Lucratoriæ omnino prohibentur, harum autem prohibendarum plures causæ fuerunt, mutui natura, charitatis defectus, & lucri cæcus furor.

TITULUS VIII.

De Pœnis.

Pœna proprie est delicti coercitio, vel estimatio.

Pœnarum, quibus utitur Ecclesia ad reprimendam malitiam perversorum, quædam sunt fori interioris, quædam vero sunt fori exterioris & Judicarii.

Pœ-

Pœnæ fori interioris sunt eæ, quas Sacerdos peccatori confitenti, inspectis singulis rerum & personarum differentiis imponit.

Pœnæ fori exterioris & judicarii sunt, quæ cum strepitu forensi publice inferuntur ab iis, qui exteriorem & contentiosam jurisdictionem habent.

¶ Altera pœnarum jurē Canonico divisio fit in spirituales; & temporales.

Spirituales sunt quæ in animam decernuntur, ut Excommunicatio, Suspendio, Interdictum.

Temporales sunt quæ corpus affligunt, vel Patrimonium, famamve & existimationem minuunt,

Primi generis est incarcerationio, & fustigatio, ita tamen ut ad effusionem Sanguinis non procedat; Ecclesia enim abhorret a sanguine.

Secundi generis est spoliatio beneficii & mulcta pecuniaria.

Tertii generis est infamiae irrogatio.

TITULUS IX.

De Censuris Ecclesiasticis.

Pœnæ nomen latius patet, quam censuræ; omnis quippe censura poena est, non contra.

Est autem censura poena spiritualis & medicinalis spiritualium privationem, vel suspensionem continens.

Solus fidelis censuris obnoxius est; solus quoque vivus, licet mortuus illis irretitus declarari possit, eamque ob causam Ecclesiastica sepultura privari: denique solus peccato mortali gravatus & contumax censuris obnoxius est; quia censura est poena medicinalis, unde absque prævia monitione inferri non debet.

Censuræ tres sunt species, Excommunicatio, Suspendio, & Interdictum.

Depositio autem & Degradatio cum non sint poenæ medicinales, censurarum numero non adscribuntur, nisi improprie. Cen-

Censura quoque non est irregularitas, quia proprie obex est, impedimentum, seu inhabilitas non poena; nec semper ex delicto nascitur.

TITULUS X.

De Excommunicatione.

Excommunicatio est censura Ecclesiastica qua fideles a Sacramentorum participatione, vel ab ipso Ecclesiae corpore, & omni Fidelium communione excluduntur.

Duplex distinguitur, major & minor.

Major excommunicatio quæ & anathema dicitur est ea, quæ privat irretitum a participatione Sacramentorum, & a Fidelium communione.

Minor est quæ privat excommunicatum a participatione passiva Sacramentorum, non tamen a Fidelium communione: quin etiam ea in-

no-

nodatus retinet quæ jurisdictionis sunt, puta eligit, licet non possit eligi.

Alia excommunicationis divisio fit in eam, quæ dicitur a jure seu latæ sententiæ, & eam quæ dicitur a judice, seu ferendæ sententiæ.

A Jure seu Canone excommunicatio, seu latæ sententiæ, dicitur ea quæ irrogatur ipso facto, lege ipsa, seu ipso Canone factum notante, nullo interveniente Judicis officio, ut si quis violentas manus in Clericum injecerit.

Ab homine, seu ferendæ sententiæ excommunicatio dicitur ea quæ a Judice pronuntiatur.

A minori excommunicatione absolvit qui & a peccato; a majori qui ligare potest. nisi reservata sit summo Pontifici absolutio; urgente tamen mortis periculo etiam simplex Sacerdos potest a qualibet excommunicatione absolvere.

TITULUS XI.

De Suspensione.

Suspensio est censura Ecclesiastica quæ Clerico, Ordinis, Officii, vel Beneficii executionem inhibet.

Differt ab excommunicatione, primo quod cadat in Clericos tantum, excommunicatio vero etiam in Laicos cadit.

2. Quod a functionibus Ecclesiasticis tantum Clericum prohibeat, excommunicatio vero separat irritum a Fidelium communione, aut saltem a participatione Sacramentorum.

Triplex circumfertur suspensionis divisio.

Prima fit in generalem & particularem.

Generalis est quæ in totum, seu ab omnibus functionibus Clericum prohibet, puta quando simpliciter & absolute concepta est.

Par-

DE SUSPEN.

113

Particularis est ea quæ prohibet a certarum functionum exercitio, relicto cæterarum usu.

Secunda suspensionis divisio est in eam quæ infligitur ad certum tempus, quo elapso ipso jure tollitur, & eam quæ infertur sine ulla temporis præfinitione, & tandiu durat donec absolutio impetrata fuerit.

Tertia est in eam quæ infertur a Jure, & eam quæ ab homine infertur.

Ea autem quæ a Jure infertur est quæ ipso facto & Canonis potestate infertur. Non tantum summus Pontifex ab ea potest absolvere, verum etiam Episcopus.

Illa vero quæ ab homine infertur est quæ sententia Judicis, præmissa Canonica monitione, adhibita scriptura & causa suspensionis expressa infertur. Ab hac absolvit qui inflixit, vel ejus Superior si appellatum sit.

Por-

Porro qui contra Suspensionem ministrat, fit irregularis.

TITULUS XII.

De Interdicto.

Interdictum est censura Ecclesiastica qua certis personis, certisve locis, divinis Officiis, sepultura, Sacramentorum administratione; aut perceptione interdictur.

Triplex est interdictum, personale, locale, & mixtum.

Personale est quod prolatum est in personas; easque duntaxat ligat in quas prolatum est.

Locale est quod Prolatum est in loca ipsa.

Mixtum est quod in personas & loca ipsa prolatum est.

Præterea sicut excommunicatio & suspensio, ita & interdictum, vel ipso jure, vel ab homine infligitur.

Qui interdictum sciens violat. irregularitatem incurrit, a qua solus
sum

summus Pontifex eum liberare potest.

Observandum tamen est tempore interdicti Baptismum, Confirmationem, & morientibus Poenitentiam; atque Eucharistiam ministrari posse.

Possunt quoque tempore interdicti divina Officia submissa voce, clausis januis, non pulsatis campanis celebrari, certis diebus exceptis in quibus hoc temperamentum adhiberi necesse non est.

TITULUS XIII.

De Irregularitate.

Irregularitas censura quidem non est, ut jam diximus, sed censuræ affinis, & ex ea sæpe nascitur.

Irregularis dicitur qui est extra regulam, qui alienus est a regula, & quem Canon, seu regula non admittit: Clericus enim debet esse irreprehensibilis, unde in quibus ca-

libus sacri Canones aliquem notant, ut reprehensibilem, is certe est irregularis.

Est autem irregularitas Canonice impedimentum, quo quis prohibetur ordinari, aut ministrare in susceptis Ordinibus, vel ad superiorem ascendere.

Dicitur Canonicum impedimentum, tum quia sacri Canones definirunt, qui possint ad ordines admitti vel non, tum quia nulla admittenda est irregularitas, nisi quæ in jure expressa sit.

Ex plurimis causis nascitur irregularitas, sed omnes ad duas possunt revocari, nempe ad defectum, & ad delictum.

Prioris generis sunt defectus natalium, vitium corporis, bigamia, servitus, & obligatio ad ratiocinia.

Posterioris generis sunt homicidium, simonia, contumacia & crimina fere omnia, modo notoria sint non occulta.

Defectus natalium, quia licet ipsi cul-

culpa vacent, turpitudine tamen natalium dedecori Ecclesiæ esse potest.

Vitium corporis, non quodlibet ut olim, sed illud duntaxat quod Officii executionem impedit, vel quod sine scandalo Officio fungi non patitur.

Bigamia, quia is qui carnem suam divisit, aptus non est ad repræsentandam unitatem conjugii, quod Christus per Incarnationem cum Ecclesia contraxit.

Servitus, quoniam Ecclesia tollere noluit Jura Dominorum in servos.

Homicidium, nisi ita necessarium sit, ut qui insidiatorem occidit, non potuerit aliter periculum effugere; vel nisi homicidium casuale omnino sit, & absque culpa; adeo ut qui aliquem casu interemit non dederit operam rei illicitæ, & præterea congruam diligentiam adhibuerit.

Contumacia, nempe in Clerico excommunicato, deposito, vel interdicto ministrante.

Tol-

Tollitur irregularitas per dispensationem summi Pontificis, si ex defectu natalium oriatur, tollitur per subsequens Matrimonium, item per professionem vitæ regularis.

TITULUS XIV.

De Depositione, seu Degradatione.

Depositio est pœna Canonica qua quis in totum, & in perpetuum a suo gradu ejicitur.

Differt hæc pœna a censuris Ecclesiasticis, quod illæ sint medicinales, & ad tempus tantum irrogentur; depositio vero sit in perpetuum, adeo ut depositus non possit esse quod antea fuerat, nisi gradum amissum de manu Episcopi recipiat.

Duplex distinguitur, scilicet verbalis & actualis.

Verbalis est ea, quæ fit Judicis sententia.

Actualis, quæ specialiter de grad-

datio dicitur, est ea quæ fit sole-
nni detractio vestium, & orna-
mentorum sui ordinis gradatim fa-
cta.


Fieri debet utraque a proprio
Episcopo, certo Episcoporum nu-
mero assistente, puta duodecim in
judicio Episcopi, sex in causa Pre-
sbyteri, & tres in causa Diaconi.


Sed quia difficile esset tot simul
Episcopos convenire, potest depo-
ni Presbyter a solo Episcopo, vel
ejus Vicario generali, assistentibus
loco Episcoporum Abbatibus; vel
aliis personis in dignitate Ecclesia-
stica constitutis.


Certe in minoribus Ordinibus
numerus Episcoporum non requiri-
tur.

FINIS.










Biblioteka Jagiellońska



stdr0028811

2

